

MPO NA NINI KOGANGA? LOBA!



Nkolo apambola bino! Totikala mwa moke ndenge totelemi, wana togumbi mitó. Lilombo moko ya ndenge mosusu ezali? Soki bolingi, botalisa yango na kotombola maboko epai na Nzambe, pe na nzela na yango, boloba: “Nkolo, Oyebi bosenga na ngai.”

² Tata na biso na Likolo, tozali mpenza ba-bato oyo bazui litomba na ntongo oyo, ndenge tosangani na ndako ya Nzambe, wana toyebi ete bato mingi bakokaki kolinga kozala na ndako ya Nzambe na ntongo oyo, kasi bazali na balopitalo pe na bambeto ya bokono. Opsi biso litomba ya kozala awa lelo. Pe toyaka awa soki moke te, Nkolo, mpo na komonana na bamosusu, atako tolingaka kokutana na bamosusu; kasi tokoki kosala yango na bandako na biso. Kasi toyebi awa mpo na kokutana na Ye Oyo asangisi biso lokola bana pe bandeko ya bolingo.

³ Totondi Yo sikawa. Pe nzela bobele moko oyo toyebi mpo na kokutana na Yo malamumu ezali zongazonga na Liloba na Yo. Liloba na Yo ezali Solo. Tosangani awa mpo na kozua makasi ya molimo. Tosengeli na yango, Nkolo. Tosengeli kozala na makasi mpo na koyikela mpiko bikulusu oyo tomemi. Tosengi ete Otindela biso Molimo Mosantu ya nkembo lelo, pe Opeba biso nyonso makasi. Yanola na bosenga ya bato na Yo wana basangani pe batomboli maboko epai na Yo, mpo na kotalisa ete bazali na bosenga ya biloko yango. Yanola moko na moko, Nkolo.

⁴ Totondi Yo ndenge obatelaki bomoi ya Ndeko na biso ya mwasi Ungren lobi na mpokwa, na likama ya motuka wana ezalaki ye koya awa. Ozalaki na boboto mpo na bango, Nkolo, pe totondi Yo mpo na yango. Sikawa tosengi, Tata na biso na Likolo, ete Okoba kozala na biso pe kosunga biso wana ezali biso kati na mobembo, moko na moko na biso. Zinga biso na nguya na Yo pe pesa biso ko—kondima ya koyeba ete Bozali na Yo oyo ezangaka soki moke te ekozala na biso. Na ntango oyo tokokoka komisunga te, toyeba ete “Banje na Nzambe bakozingela esika na baoyo bakotosaka Ye, pe Bakomema biso na maboko na bango, ete totuta litambe na biso na libanga te.” Tosengi sikawa ete Opeba biso ndambo na mapamboli na Yo mpo na Liloba, pe Oloba na nzela na biso, pe kati na biso, na Nkombo na Yesu Klisto. Amen.

⁵ Nazali na matondi ndenge moi ezali kongenga libanda, moi mpenza, ezali kongenga. Ntango ezalaki mabe mingi na ntongo. Nabanzi, koleka mingi na etuka oyo, molili pe ntango mabe ezalaka mingi. Pe komona moi kongenga, kobima, ezali mpenza malamumu mingi.

⁶ Mpo na mwa liyangani ya libota lelo, nakokutana na bandeko na ngai, pe bazali kuna na ndako ya ndeko na ngai ya

mwasi, na bandeko na biso mosusu oyo bafandaka pembeni na engumba pe nzinganzinga. Ba-Branham bazali ebele mpenza. Soki bango nyonso bauti na Kentucky, bayei kosangana awa, nabanzi ete tokosengela kofutela engumba mobimba; bazali mpenza ebele. Kasi ezali bobele mwa bozongi na libota. Bisu nyonso tozaláká kokutana na ndako ya mama, pe ye nde azalaki likonzi, toloba, oyo ezalaki kosangisa biso elongo. Kasi Nzambe amemi likonzi yango na Lola, pe nazali na elikia ete mokolo moko biso nyonso tokokutana kuna.

⁷ Na bongo mokolo moko nazalaki koloba, nalobaki: “Boyebi, nabanzi ete na—nakoyeisa mateya na ngai ya mikolo ya lomingo mokuse kino na miniti penepene ntuku mibale, pe—pe, to ntuku misato, pe na nsima nakobondela mpo na babeli.” Pe nakanisaki yango na ntongo oyo.

⁸ Lobi na mpokwa nakanisaki, ntango Ndeko mwasi Downing abengaki ngai pe alobaki ete, abengaki Billy pe alobaki ete ye na Ndeko mwasi Ungren, ntango bazalaki na nzela, baselumwaki kino na ngambo ya nzela pe bazuaki likama. Pe wana Billy azalaki naino na lininisa, pembeni, nayebi te soki ezalaki ngonga nini; mbala mosusu na ntongo ya lelo, na ntango moko boye. Nautaki kolala mwa moke. Nabwakaki miso epai ya Bandeko Wood, minda ekufaki. Nafukamaki mpo na kobondela, pe na ntango yango, Eloko moko elobelaki ngai: “Nyonso ezali malamumu.” Na bongo nalobaki na Billy: “Yebisa ye: ‘Nyonso,’ nakanisaki, ‘ekozala malamumu.’” Nasepeli mingi ndenge namoni bango awa na ntongo oyo, pe bafandi kati na ndako na Nkolo, na nsima awa, nsima na oyo esalemaki na nzela.

⁹ Bato oyo balingi yo mingi boye, na lolenge ete bazali kouta na ntaka ya ba-kilométele nkama na nkama mpo na koyoka Nsango Malamumu, nsima na yango namilobelaki: “Liteya ya miniti ntuku mibale, na ndenge nalobaka malembe boye, ekozala malamumu te.” Na bongo nakanisaki ete nako . . . ya molai boye.

¹⁰ Bongo na nsima, koyoka Ndeko Ungren, mwana na ye ya mobali, na ntongo oyo, koyemba: “Yo Monene.” Azali na . . . Azali monene mingi mpo na ye, na ntongo oyo, koleka ndenge Azalaki lobi na nsima na nzanga, mpo ete Nzambe monene ya Likolo abateli mama na ye ya bolingo pe ndeko na ye ya mwasi.

¹¹ Sikawa, lelo, tozali kozela na mitema lukúluku ntango malamumu kati na Nkolo. Pe, awa, nazalaki na mateya mibale to misato oyo ekeseni, oyo nazalaki kotala, kasi nazalaki, nakokaki koyeba malamumu oyo nalingaki kolobela na ntongo oyo te. Moko na yango ezalaki: “Bobwaka epai na Ye mitungisi na bino, zambi Ye moto akotalaka makambo na bino. Bongo, soki Ye nde akotalaka makambo, mpo na nini bino te?”

¹² Na bongo oyo mosusu, Billy Paul, to Billy Paul te . . . Mwana na ngai mosusu ya mobali, Joseph, ye moto apesaki ngai liteya yango eleki ntango molai. Mokolo moko azalaki na ndako ya

kolala, pe alobaki, wana atombolaki miso na liyemi, pe Billy . . . To, Joseph alingaka masuwa mingi, lokola bana mike; masuwa pe bampunda, boyebi. Pe alobaki na ngai: “Papa, Yesu azali na masuwa?”

Nalobaki: “Nayebi te.”

¹³ Na bongo nsima na ye kotelema pe kobima, nabandaki kokanisa: “Azali na masuwa?” Nazuaki liteya uta na yango, pe nakomáki yango awa na kayé na ngai: “Yesu azali na masuwa?” Pe nabandaki kokanisa. Ntango Azalaki awa na mokili, Asengelaki kodefa libumu mpo na kobotama, nkunda mpo na kokundama, masuwa mpo na koteya, kasi Ye nde Motambwisi masuwa ya kala ya Siona. Na ntembe te, Azali na yango. Kasi, yango nde mateya oyo nazalaki kokanisa, kokanisa ete mbala mosusu nsima nakokaki koteya yango, liboso ete tolongwa mpo na kozonga.

¹⁴ Boyebi, nalingaka koteya awa na losambo, mpo ezali ndakonzambe na biso moko. Tomiyokaka na bonsomi ya koloba nyonso oyo Molimo Mosantu alobi. Na bisika mosusu, atako moto yango alingi koyamba yo malamú, okomiyoka lokola moto akangami mpo ete—ete ozuami na ndakonzambe ya moto mosusu, pe okolinga kozala malamú na ndenge ekoki mpo na kotosa makanisi na—na bango pe malakisi na bango.

¹⁵ Nalekisaki ntango malamú póso oyo, kuna epai na Ndeko Burcham. Nakotaki epai basalaka fromáje. Namoni ete ye na mwasi na ye, mwana na ye ya mobali pe bamosusu, bazali awa na ntongo oyo. Nazalaki ntango nyonso kokanisa ete esika basalaka fromáje ezalaka lokola bisika mosusu oyo nakótá, oo, mwa bosoto pe salité. Ólalá, nakoki koloba likambo bobele moko, bokoki solo kokitisa mitema ete esika wana ezali na salité te. Ezalaki esika oyo eleki peto oyo nakótá, pe koleka mingi esika bisalelo ezuami. Pe nandimaki te; nakanisaki, oo, mbala mosusu basalaka livre mokama [45 kiló—N.D.T.] ya fromáje na mokolo. Kasi basalaka tone motoba mokolo na mokolo, pe bisalelo misato kati na yango nde esalaka. Nakanisaki: “Ólalá, banani baliaka fromáje nyonso wana?”

¹⁶ Kasi Nkolo apamboli mobali oyo. Nazuaki litomba ya kozala na ndako na ye, ndako moko kitoko, ná mwasi malamú oyo amibulisi. Pe bazali na ntina te ya kozanga kobika mpo na Klisto mokolo na mokolo, ndenge babikaka. Nakutanaki na bana na ye ya mibali, pe bazali bana malamú mpenza. Tozali na matondi mingi mpo na bokutani oyo bamoko na bamosusu.

¹⁷ Nayaki komona ete mokengeli na bango ya kala azali mo—mobali moko oyo nayebi, Ndeko Gurley, mobali moko malamú mpenza, ya kondima ya ba-Pentekotiste oyo Basangani, oyo nakútánáká na ye eleki mibu ebele, na Jonesboro, Arkansas. Pe nayebaki te ete bazalaki . . .ete, nzoka nde, ye nde azalaki mokengeli na ye.

¹⁸ Na bongo, bokanisa mayangani ya mpokwa ya lelo. Nsima na yango, soko Nkolo alingi, nabanzi ete nakoteya lisusu lomingo lokoya. Nsima na yango nakanisi ete lomingo lokolanda nasengeli bongo kokende na Chicago. Na nsima nakozala awa te mpo na mwa ntango, nasengeli kozongisa libota epai na biso, kozongisa, to kozonga na Arizona na ntina ete bango, bana, bakoka kokomisama lisusu na kelasi. Pe na bongo tokotika kotungisa mokengeli, na kokamataka mayangani na ye.

¹⁹ Na bongo, na bongo tozongisi matondi mingi epai ya Ndeko Neville mpo na boniangeli na ye, boyebi, ndenge—ndenge abengisaka ngai. Pe azali mpenza, te . . . nasepelaka, bandeko, na moto ya boye, bokosi ezali kati na ye te, bomilingi ezali kati na ye te, bobele Boklisto oyo ya solo. Ngai nalingaka bongo.

²⁰ Sikawa tokotanga ndambo na Makomi nsima na yango nde tokobakisa maloba. Nayebi te soki tokobima na ngonga nini, na Mateya milai boye, kasi nakanisi . . . Mokolo mosusu nazalaki koloba na ntina na koteya ntango molai, pe moto moko alobaki: “Boye, sikawa, soki o—soki otei bobele na mwa miniti moke; pe oteyaka na mwa lolenge ya mabombami, ata boni,” alobaki, “to—tokokoka soko moke te kososola yango.” Alobaki: “Koba bobele koloba, pe nsima na mwa ntango ekokoma polele,” alobaki bongo. Boye mbala mosusu Nkolo nde alingi ete tósálaka bongo.

Togumba lisusu mitó.

²¹ Nkolo, Liloba na Yo etiami polele likolo na eteyelo, pe toyebi solo ete mokolo moko Ekokangama mpo na mbala na Yango ya suka, bongo Liloba ekokoma mosuni. Lisusu tozali—tozali kozongisa matondi na ntongo ya lelo mpo na ntango oyo. Fungolela biso, na nzela na Molimo Mosantu na Yo, makambo oyo ezuami na kati ya Liloba oyo tokotanga. Tika ete Molimo Mosantu alakisa biso lelo makambo oyo tosengeli koyeba. Tika ete biso pe, na ngambo na biso, toyoka na bokebi Liloba moko na moko, topima Yango na bozindo. Lisusu tika ete baoyo bazali koyoka na nzela na bande, tika ete bayoka na bokebi. Pe tika ete tokoka kosimba oyo Molimo Mosantu azali koluka komonisa biso. Mpamba te toyebi solo ete, soki Asengeli kopakola biso, na bongo epakweli ezali ya mpamba te. Ezali na ntina, mpo esala mpo na bolamu, mpo na Nkolo. Tika ete mitema pe lisosoli na biso efungwama, Nkolo.

²² Tika ete tozala na bonsomi ya koloba, pe na bonsomi ya koyoka, tokoka pe kokoma kino na kondima, mpo na kondima makambo oyo tokoyoka, ndenge ezali kouta na Liloba na Nzambe; mpo ekoika komema biso na Bomoi ya Seko, na Mokolo monene oyo ezali koya. Pambola biso lelo. Pamela biso ntango tozuami na libunga. Talisa biso mbeba na biso. Pe pambola biso na nzela oyo ezali ya sembo, mpo tokoka koyeba nzela nini kolanda, pe ndenge nini kotambola na ekeke oyo; mpo, wana ezali biso kobika awa, tokoka kopesa lokumu epai na

Yesu Klisto, Oyo akufaki mpo na kopesa biso Bomo na ngambo mosusu na nkembo. Tosengi bongo na Nkombo na Yesu. Amen.

²³ Sikawa nalingi kotánga bobele na bisika mibale kati na Makomi, na ntongo oyo. Moko na yango ezuami na Mokanda na Esode. Kútu, nyonso mibale ezuami na Mokanda na Esode. Moko, na mokapo ya 13, nzela ya 21 pe ya 22. Pe mosusu na mokapo ya 14, nzela ya 10, 11 pe 12. Sikawa nakotanga na Esode 13:21.

Yawe akendeki na liboso na bango kati na likonzi na lipata na ntango na moi ete akamba bango na nzela, pe na butu. . . likonzi na móto ete apesa bango pole, boye bakokaki kotambola na moi pe na butu.

Likonzi na lipata na ntango na moi pe likonzi na móto na ntango na butu elongwaki na liboso na bato te.

²⁴ Sikawa na Esode 14, nzela ya 10.

Ebelemaki Faló, bato na Yisalaele batombolaki miso, pe tala, Baezipito babilaki bango, pe babangaki mingi. Bato na Yisalaele bagangaki epai na Yawe.

Pe nsima balobelaki. . . Mose ete, Ezali ete. . . (bolimbisa)

Pe balobelaki Mose ete, Ezali ete mayita mazangí na Ezipito, yango wana okambi biso awa ete tokufa na lisobe? Osaleli biso nini, wana ebimisi yo biso na Ezipito?

Tolobeli yo boye na Ezipito te, ete, Tika biso tosalela Baezipito? Mpo ete kosalela Baezipito ezalaki malamú koleka kufa na lisobe.

²⁵ Nakotánga lisusu mwa milongo mosusu.

Mose alobelaki bato ete, Banga te. . .

Sikawa boyoka na bokebi.

Mose alobelaki bato ete, Banga te, telema ngwi pe tala kobikisa na Yawe ekosala ye mpo. . . bino lelo, mpo ete Baezipito oyo emoni bino lelo, bokomona bango lisusu soko moke te.

Yawe akobunda mpo na bino, pe bino bokotikala nye. . . Yawe alobelaki Mose ete, Ogangi epai na ngai mpo na nini? Lobela bato na Yisalaele ete baleka na liboso.

Tombola lingenda na yo pe sembola loboko na yo na likolo na mai pe kabola yango ete bato na Yisalaele bakende na mokili mokaoki kati na mai.

Ngai nakoyeisa motema na Baezipito makasi ete bakota nsima na bango pe nakozua nkembo na ntina na Faló pe na ebele na basoda na ye nyonso, pe makalo na ye pe na bato na ye na mbalata.

Baezipito bakoyeba ete ngai nazali YAWE wana esili ngai kozua nkembo na ntina na Falo pe na makalo na ye pe na bato na ye na mbalata.

Bongo mwanje na Nzambe oyo akendeki liboso na ebele na Yisalaele, alongwaki pe akendeki nsima na bango, pe likonzi na lipata elongwaki. . . liboso na bango pe etelemaki nsima na bango,

Boye ekomaki kati na ebele na Baezipito pe ebele na Yisalaele. . . lipata ezalaki, pe molili, pe yango epelaki na butu pe oyo moko abelemaki na oyo mosusu na butu mobimba te.

Bongo Mose asembolaki loboko na ye na likolo na mai na monana, pe YAWE azongisaki mai na monana na mopepe makasi moutaki na kobima na ntango, na butu mobimba, pe ye azalisaki mai mokili mokaoki, pe mai ekabwanaki.

Bato na Yisalaele bakendeki kati na mai na monana na likolo na mokili mokaokaki pe mai mazalaki etutu mpo na bango na loboko na mobali pe na loboko na mwasi.

Baezipito babenganaki pe bakotaki nsima na bango kati na mai na monana, mbalata nyonso na Falo pe makalo na ye pe bato na ye na mbalata.

Na ntongo-ntongo YAWE atalaki Baezipito na nse longwa na likonzi na móto pe. . . lipata pe abulunganisaki ebele na Baezipito,

Pe akangaki yika na makalo na bango boye kobenda yango ezalaki bozito. Baezipito balobaki ete, Tokima na liboso na Yisalaele mpo ete YAWE azali kobunda na Baezipito na ntina na bango.

²⁶ Liloba na Nkolo ezali malamunsi mingi, kitoko mingi, na lolenge ete nzela ya kokata kotángá Yango ezali te. Ezali mpenza kokóma Bomoi, ntango tozali kotángá Yango. Nakanisi, kati na liteya oyo na ntongo ya lelo, atako bazali kokanga yango na bande, nalingi koloba boye mpo na kobanda, ete ezali kozua, ngai moko pe nazuami na kati. Pe ntina oyo ngai. . . Lobi, ntango nazalaki koyekola, nakómákí na likambo oyo, pe namilobelaki: “Soko Nkolo alingi, nakoloba likolo na yango, mpamba te ezali kokweisa ngai.” Pe nabanzi ete ezali kokweisa biso nyonso, mpo tokoka kofungwama miso, pe etinda biso totombola miso; pe mpo toyekola mwa moke, na kokokanisa eleko oyo kuna, e. . . na eleko oyo.

²⁷ Nalingi kozua maloba misato mpo na motó na liteya, pe ezali: *Mpo na nini Koganga? Loba!* Awa, na nzela ya 15, Nzambe alobaki na Mose: “Mpo na nini ozali koganga epai na Ngai? Loba na bato ete bakende liboso.” Pe: *Mpo na nini Koganga? Loba!*

28 Sikawa, tozali na motó na liteya moko monene, pe nakomeka kosala nokinoki mpenza, ndenge Molimo Mosantu akokamba. Pe nalingi kokanisa . . . motó na liteya oyo, ndenge Mose agangaki epai na Nzambe, na ntango na mpassi; pe ndenge Nzambe ayanolaki Mose na mpamela, kaka na ntango ya—ya mikakatano. Pe ezali lokola ete esálémá bongo, ete moto ágángaka. Lisusu, oyo nde—nde mpamela, ete Nzambe ábaluka mpo na kopamela ye mpo na oyo alobaki, ndenge agangaki epai na Ye. Ezali komonana ete ezali likambo makasi.

29 Mbala mingi, ntango totalaka Makomi, na lolenge na biso ya kotala, emonanaka lokola ezali makasi. Kasi soki toyekoli Yango mwa moke, tomonaka ete Nzambe na—bwania—nyonso ayebi malamau makambo oyo Azali kosala. Ayebi ndenge nini kosala makambo yango pe ndenge nini kosala ná bato. Ayebi oyo ezali kati na moto. Ye, Ayebi ye. Bisu toyebi te. Toyebi bobele na mayele ya bongó. Ye ayebi oyo mpenza ezali kati na moto.

30 Mose abotamaki na mokili oyo, ná likabo. Abotamaki mpo na kozala mosakoli, mosíkoli. Abotamaki ná bisalelo kati na ye, ndenge moto nyonso na mokili abotamaka ná bisalelo, ndenge nandimaka mpenza bo—boyebi liboso ya Nzambe, ná kobongisama liboso.

31 “Ezali te ete Nzambe alingi ete bamosusu babeba, kasi ete bato nyonso bákóma kobongwana na motema.” Kasi, lokola Nzambe, Asengelaki koyeba, pe Ayebi, “ayebi suka longwa na ebandeli.” Bomoni? Soki Ayebi yango te, na bongo Azali te oyo azangi suka; pe soki Azali te oyo azangi suka, boye Azali pe Nzambe te. Na bongo, solo mpenza, Alingaki te ete bamosusu babeba, kasi A—Ayebaki nani akobeba pe nani akobeba te. Yango nde ntina, ntina mpenza oyo Yesu ayaki na mokili, ezalaki mpo na kobikisa baoyo Nzambe amonáká, na nzela na Ye ya koyeba makambo liboso, ete bazaláká na mposa ya kobikisama, bomoni, mpamba te mokili mobimba ekweisámáká. Pe namoni ndenge mosusu ya koteya yango te libanda na boyebi liboso ya Nzambe, pe Biblia elobi polele ete “Ayebi suka longwa na ebandeli,” pe Akoki koloba yango.

32 Yango wana, soki mo—moto aluki ete kozala eloko oyo ye azali te, azali bobele komekola, pe ata ndéle ekobimisa yo polele. Masumu na yo ekobimisa yo polele. Okoki kozipa yango te. Eloko ezipaka masumu ezali se moko, ezali nde Makila na Yesu Klisto, Ekoki pe kotiamana likolo na yo te bobele soko Nzambe abéngá yo longwa na ebandeli na mokili. Yango nde ntina Makila wana esopanaki; ezali te mpo eniatama, etiolama, pe—pe basala na Yango oyo balingi, pe—pe balobela Yango mabe, pe—pe bongo na bongo. Ezalaki na ntina moko oyo eyebani. Ya solo. Ezali te mpo basakana na Yango, ezali te mpo bamekola Yango, na kolobáká ete masumu ezipami na ntango oyo ezipami te. Pe masumu ya moto moko te ekoki kozipama bobele soko nkombo na ye ekomámá na Buku na Bomo na Mwana na Mpate liboso na

kozalisama na mokili. Yesu, Ye moko, alobaki: “Moto akoki koya epai na Ngai te bobele soko Tata akobenda ye. Pe baoyo nyonso Tata asila,” na eleko eleka, “kopesa Ngai, bakoya epai na Ngai.” Ya solo. Na bongo okoki kosala te ete Maloba ékósa. Ezali wana mpo na kotatola Solo pe mpo na kosembola.

³³ Pe Mose abotamaki ná likabo ya kondima; Mose azalaki na kondima monene. Tomoni yango komonisama, nsima na mwa ntango, kati na ye. Abotamaki na libota moko ya lokumu, ndenge toyebi ete tata na ye pe mama na ye bazalaki bato na libota na Lewi. Kútu, lisolo oyo kuna, liboso na oyo, na Mokanda ya—ya Esode, ezali koloba na bolamu mpenza bomoi ya moto monene oyo. Pe azalaki moko na—na bato oyo baleki monene na Biblia, mpamba te azalaki mpenza elilingi ya Nkolo Yesu.

³⁴ Mbotama na ye ezalaki mpenza ndenge, lokola Nkolo Yesu. Abotamaki na ntango na minioko, lokola Nkolo Yesu. Abotamaki mpo na kozala mosíkoli, lokola Nkolo Yesu. Baboti na ye babómbáká ye, mosika na monguna, lokola Nkolo Yesu. Akómákí na ntango na ye ya mosala, lokola Nkolo Yesu. Azalaki mokambi, lokola Nkolo Yesu. Azalaki mosakoli, lokola Nkolo Yesu. Pe azalaki mopesi mibeko, lokola Nkolo Yesu.

³⁵ Tomoni pe ete akufaki likolo na Libanga, esengeli pe kozala ete asekwaki pe bongo na bongo, mpo ete, mibu nkama mwambe nsima na yango, azalaki na Ngomba ya Mbongwana, wana ezalaki ye kosolola ná Nkolo Yesu. Bomoni? Banje bamemaki ye. Moto moko te ayebi esika bakundá ye. Ata zabolo ayebaki yango te. Solo mpenza, ngai nandimaka te ete bakundáká ye. Na—nandimaka ete Nzambe amemaki ye, pe—pe ete akufaki likolo na Libanga oyo azalaki kolanda mikolo nyonso na bomoi na ye.

³⁶ Azalaki elilingi oyo ebongi be ya Klisto. Azalaki mokonzi mpo na bato. Azalaki mopesi mibeko. Azalaki mo—azalaki mo—mosungi mpo na bato. Azalaki, na—na elilingi, nyonso oyo Klisto azalaki.

³⁷ Sikawa tomoni, na bongo, ete abotamaki ná makabo pe makoki minene oyo kati na ye, nsima, esengelaki bobele ete Eloko moko engengisa yango, mpo ezua Bomoi.

³⁸ Bomoni, momboto na Nzambe etiámá, solo, kati na biso longwa na ebandeli na mokili. Pe ntango Pole wana ebeti momboto mbala ya liboso, Epesi yango Bomoi, kasi esengeli liboso ete Pole ébéta momboto.

³⁹ Ndenge natéyáka mbala mingi likolo na mwa mwasi oyo azalaki na liziba, na lolenge na ye wana. Atako azalaki mwasi na—na bomoi mabe, atako bomoi na—na ye esilaki lokumu, pe azalaki na lolenge wana mpamba te bonkoko esimbáká ata ye te, kasi, nzoka nde, ntango Pole wana ebetaki ye mbala ya liboso, asosolaki Yango noki, mpamba te eloko moko ezalaki kuna mpo na koyanola Yango. “Wana bozindo ezali kobenga

Bozindo,” esengeli ete Bozindo moko ezala esika moko boye mpo na koyanola na mbela yango.

⁴⁰ Pe Mose abotamaki mosakoli, kasi abokolamaki na eteyelo ya mayele pe na ndako na Falo. Falo Seti, oyo azalaki mokonzi ntango Mose azalaki kokola, azalaki moto oyo azalaki naino na lokumu, pe azalaki kondima ete Yosefe azalaki mosakoli na Yawe. Kasi Ramses ayaki nsima na Seti, pe Ramses azalaki kokanisa Yosefe te. Na bongo, yango wana, na ntango yango nde mindondo ebandaki, na ntango wana, ntango Falo moko, oyo ayebaki Yosefe te, akómákí mokonzi.

⁴¹ Kasi makoki minene oyo, tolobela yango naino mwa moke, pe, liboso ete tókóma na mama na likambo ya liteya. Nazalaka na lolenge moko ya ndenge mosusu ya kobongisa liteya, nsima na yango kotonga yango, pe tika ete Nkolo asunga biso na ntongo oyo wana tozali kotonga yango.

⁴² Mose, abotamaki ná likabo oyo monene ya kondima. Nsima, apakolamaki pe azuaki etinda na nzete ekopela móto, mpo na kosíkola libota na Nzambe. Sikawa, bomoni makabo minene oyo mobali oyo azalaki na yango! Abotamaki mpo na likambo moko boye. Nzambe azalaki na mwango moko kati na yango.

⁴³ Nzambe azali na mwango moko mpo na bino ndenge bozuami awa. Bomoni? Soki bokoki bobele kozala, kokóma na esika yango, ekosala ete Nzambe amitungisa mingi te, ná yo moko lokola.

⁴⁴ Mose abotamaki, pe lisusu, nsima na yango, amemamaki na—na esika oyo apakolamaki. Pe, botala, momboto ezalaki wana ná lisosoli ya mayele, ná kondima nyonso ete abotamaki mpo na kosíkola libota yango, nzoka nde ezuaki Bomoi te kino ntango Pole oyo eutaki na nzete ekopela móto ebetaki yango; kino ntango amonaki, ezalaki eloko oyo atangaki te, kasi eloko oyo amonaki na miso na ye; Eloko moko oyo ezalaki kolobela ye pe ye azalaki koyanola Yango. Oo, epesaki yango mpenza Bomoi.

⁴⁵ Nakanisi mobali nyonso oyo azali na...to mwasi, elenge mobali to elenge mwasi. Pe nakanisi, na lisosoli ya mayele ya oyo bakanisaka ete yango nde Liloba, pe bongo na bongo, ete bakoki soko moke te kozua moboko ya makasi soko naino bakutani na Pole oyo ekómisaka Liloba yango bosolo te.

⁴⁶ Nakanisi ete ata lingomba moko te na misala na yango, ata soki ezali na mayele pe na mibeko ndenge nini, lingomba yango ekoki kopambwama te soki Bikamwa naino emonisami kati na bato yango te, pe soki naino bamoni yango te. Eloko oyo bakoki kolobela yango, oyo ekoyanola bango, yango nde etatolaka Liloba oyo ekomami.

⁴⁷ Sikawa bomikanisela, ntango Mose akutanaki na nzete yango ekopela móto, Liloba wana etatolamaki mpenza. Ezalaki Liloba. Mose asengelaki komilela te: “Mongongo oyo nde nini? Ezali oyo ezali nini?” Mpamba te, Nzambe asiláká kosakola

na Makomi, na Genese, ete: “Libota na yo bakofanda na mokili mosusu oyo lokola bapaya, kasi bakozongisama nsima na mibu nkama minei, bakozonga lisusu na mokili oyo, zambi li—lisumu na ba-Amola etondi naino te.” Na bongo, mibu nkama na nkama liboso, Nzambe alobáká ete: “Yisalaele bakofanda pe bakoniokwama na mokili mosusu lokola bapaya, pe bakofanda kuna mibu nkama minei. Kasi Nzambe, na loboko na nguya, akobimisa bango.” Bongo, bomoni, ná nzete oyo ekopela móto. . .

⁴⁸ Mose ayebáká likambo oyo, na mayele ya bongó. Pe momboto oyo ebotamaki kati na ye, ezalaki kati na motema na ye. Pe amekaki, na nzela na lobiko na ye ya Liloba na mayele ya bongó, ete ámeke ko—ko—kobimisa bango, kosikola bango, mpamba te ayebaki ete abotamaki na ntina wana. Ayebaki yango, eleko wana. Makomi na mobimba na yango ezalaki koloba ete basilaki kofanda kuna mibu nkama minei.

⁴⁹ Pelamoko biso toyebi sikawa, ndenge mobali moko atunaki ngai eleki mwa ntango, na ntina na Boyei pe na Konetolama. Toyebi. Ntango na biso esí esili, ntango na Konetolama ebelemi, pe tozali kozela kondima ya konetolama oyo ekoki kobenda pe kosangisa Lingomba, pe kopesa yango makasi ya bikamwa, oyo ekoki kobongola banzoto oyo tozali kobika kati na yango. Ntango tozali komona Nzambe oyo akoki kosekwisa mokufi longwa na nse to longwa na libanda, kozongisa ye na bomoi pe kotalisa ye liboso na biso, ntango tozali komona Nzambe oyo akoki kokamata kanser oyo elei nzoto na moto kino ete atikali se mikuwa ya mpamba, pe kokómisa ye moto ya makasi pe na bokolongonu, yango nde esengeli kopesa kondima ya konetolama epai na bato. Na lolenge ete, ntango Pole wana ekongenga longwa na likolo, pe kelelo ekoyula, Nzoto na Klisto ekosangisama nokinoki, ekobongwana na mbálákáká pe ekomemama kino na Lola. Iyo, eloko moko ya lolenge wana esengeli kosalema. Kasi bakelasi na biso ya likindo ekoki soko moke te kosala yango, nzoka nde bazali malamumu na ngambo na mayele ya bongó. Kasi esengeli ete bato bakutana na Pole wana! Esengeli ete bato bazua Eloko wana.

⁵⁰ Pe awa Mose, lokola atelemisaki kobiangama na ye monene likolo na Liloba, ezalaki pe monene, kino mokolo moko akutanaki na Pole yango, pe Liloba Yango moko mpenza eyanolaki ye. Na bongo azuaki epakweli na ye. Yango epakolaki oyo azalaki na yango kati na ye, oyo ezalaki na kati, ma—mayele ya bongó oyo ezalaki kondima yango, kondima oyo etelemaki likolo na boyambi na ye epai na Nzambe, yango ekabolaki ye na mama na ye. Na bongo, ntango akómaki Liboso na Pole yango, Epakolaki oyo azalaki kondima. Bomoni? Oyo nde epakweli! Pe azuaki etinda.

⁵¹ Na bongo, toyebi ete na ndenge na mayele ya bongó, asíláká koyoka mama na ye. Ayébáká likambo nini elingaki kosalema,

pe ayébáká ete azalaki kobika na eleko yango. Kasi awa, amonaki ete alongobanaki te, na bongo akokaki . . . kondima na ye ekokaki kozonga nsima mwa moke. Kasi nsima na yango, ntango akutanaki na nzete wana, Nzambe alobaki: “Nasili koyoka kolela ya bato na Ngai, Nakanisi elaka na Ngai epai na batata na bango, Abalayama, Yisaka, pe Yakobo, pe Nakiti.” “Na,” wana, li—likitana bomei, “Nakiti mpo na kosikola bango.”

⁵² Pe sikawa, nábakisa bobele likambo oyo soki e . . . Nzambe alimbisa ngai soki emonani lokola kotúka. “Ngai nasalaka eloko moko na mokili te, soko bobele na nzela na moto. Ngai—Ngai—Ngai nazali Mobímbí; bino bozali bitape. Namimonisaka bobele ntango Nazui moto. Bongo Naponi yo, pe Natindi yo kuna mpo obimisa bango.” Bomoni? Sikawa botala, “Nakozala na monoko na yo elongo, pe Na . . . kamata lingenda oyo.”

⁵³ Pe Mose alobaki: “Okoki kotalisa ngai elembo ete Otindi ngai, ete Opakoli ngai, pe ete Okosala makambo yango?”

Alobaki: “Osimbi nini na loboko na yo?”

Alobaki: “Lingenda.”

Alobaki: “Bwaka yango na nse.” Ebongwanaki nyoka. Akimaki.

⁵⁴ Alobaki: “Lokota yango.” Ezongaki lingenda. Alobaki: “Tia maboko na yo na ntolo.” Abimisaki yango, pe ekómákí na maba. Azongisaki yango, pe ebikaki.

⁵⁵ Alobaki: “Amonaki nkembo na Nzambe.” Mpo na Mose, ntembe ezalaki lisusu te. Bomonaki yango, awelaki lisusu kozonga na biliki te? Ayebaki ete asilaki kopakolama. Ayebaki esika nini, makambo nyonso oyo ezaláká na motema na ye, makoki minene oyo, pe ye . . . esilaki kopakolama na ntango yango. Ye, abelemi. Abelemi mpo na kokende. Na bongo, akei mbala moko na Ezipito.

⁵⁶ Nzambe alobáká: “Nakozala na yo elongo,” na bongo yango—yango ekati likambo. Soki, “Nakozala na yo elongo,” bobele yango nde Mose asengelaki koyeba, mpo na kobiangama monene oyo ezalaki kati na motema na ye. Na bongo Nzambe alobaki: “Nakozala na yo elongo.”

⁵⁷ Na bongo, Nzambe pe asíláká kotatola maloba na ye, Mose. Mose azalaki koloba: “Nakutani na Yawe. Pe Alobi ete nayebisa bino: ‘NAZALI’ atindi ngai.” Bomoni?

⁵⁸ Na bongo balobaki: “Mobali moko azali awa, mo-Yuda mosusu, mbala mosusu moko na bilandálanda oyo bayaka ntango nyonso na miango ndenge na ndenge mpo na kobimisa biso na boómbo.” Pe boyebi ndenge bato bazalaka ntango bazali baómbo, to na boómbo mpo na likambo moko boye, mwa miango ya mayele mabe ezangaka koyela bango te, boyebi, mpo na kosala yango.

⁵⁹ Na bongo, Mose, Nzambe alakáká Mose: “Nakozala na yo elongo. Nakozala kati na yo. Maloba na Ngai ekozala Maloba na yo. Sakola Maloba na Ngai pe loba bobele oyo Ngai nalobi.”

⁶⁰ Na bongo ntango Mose akendeki kuna pe ayebisaki bango kobiangama oyo, atelemaki liboso na Falo, pe alobaki na ye: “Yawe Nzambe na ba-Ebele alobi: ‘Bimisa bana oyo.’” Kasi aboyaki kopesa bango nzela ete bakende. Na bongo a—asalaki elembo moko liboso na bampaka pe liboso na Falo, bilembo oyo Nzambe autaki kosala. Alobaki: “Boye, lobi, na bangonga oyo, moi ekolala. Molili ekozala na Ezipito mobimba,” pe esalemaki mpenza bongo. Na nsima alobaki: “Banzinzi e—ekoya na—na mboka,” asembolaki lingenda na ye, abengaki banzinzi, pe banzinzi eyei. Asakolaki, pe nyonso oyo asakolaki esalemaki mpenza bongo. Ezalaki nde Nzambe. Bomoni?

⁶¹ Nzambe abéngáká ye uta mbotama na ye, atiáká makoki kati na ye, ya kondima monene, nsima na yango Akitaki na Bozali na Ye pe Apakolaki eloko monene oyo ezalaki kati na ye, Atindaki ye kuna ná Liloba na Ye, pe atitolamaki na ndenge ekoki na maloba na ye. Ata soki bato na lokuta boni batelemaki, soki makambo mosusu boni esalemaki, Nzambe azalaki koloba na . . . Mose atalisamaki. Mose, oyo Mose azalaki koloba, Nzambe azalaki komemia yango. Nalingi ete bobosana Liloba yango soko moke te. Oyo Mose azalaki koloba, Nzambe azalaki komemia yango, mpamba te Liloba na Nzambe ezalaki kati na Mose. “Nakozala na monoko na yo elongo; ekoloba makambo oyo esengeli.” Boye, oyo Nzambe alobi—oyo Nzambe alobi, Akoloba yango na nzela na Mose, pe yango ezalaki kotatola pe kolongisa maloba na ye.

⁶² Lisusu, mama na ye ayébísáká ye na ntina na mbotama na ye ya kokamwa, pe ete ntango ebelemaki na eleko oyo lisiko esengelaki kosalema. Amram na—na Yokebed, mwana mobali pe mwana mwasi ya Lewi, babandaki kobondela Nzambe ete atinda mosikoli. Pe esengeli . . . soki bomoni ntango na elaka kobeleva, yango etindaka bato ete babanda kobondela pe bákóma na mposa na yango makasi. Na ntembe te ete—ete Yokebed, mama na ye, ayébísáká ye yango mbala na mbala; mpamba te azalaki pe mobokoli na ye, ndenge toyebi lisolo yango. Pe ayébísáká ye ete abóndéláká. “Pe, Mose, mwana na ngai, ntango obotamaki, ozalaki mwana moko kitoko. Ozalaki ndenge mosusu. Likambo moko esalemaki na mbotama na yo.”

⁶³ Nabetaki lisolo yango lokola lisano epai na bana, eleki ntango molai te, nalobaki: “Wana Amram azalaki kobondela na eteni ya kolala, amonaki Mwanje moko kobimisa mompanga na Ye, atalisaki yango na epai na likolo pe alobaki: ‘Okobota mwana, pe akomema bana epai na likolo na mboka na elaka.’” Nabetaki lisolo yango lokola lisano epai na bana mike mpo ete basosola; mpamba te lisosoli na bango naino ekoli lokola oyo ya

bino bakolo te, bino bokoki kosimba makambo ndenge Molimo Mosantu azali komonisela bino yango.

⁶⁴ Nzoka nde, atako mama na ye ayébísáká ye makambo yango, pe ayebaki makambo yango, ata bongo, asengelaki na bokutani mosusu. Ma—malakisi ezalaki malamumu, kasi asengelaki na bokutani oyo ya ye moko.

⁶⁵ Yango nde oyo mokili esengeli na yango lelo. Yango nde oyo lingomba esengeli na yango lelo. Yango nde oyo moto nyonso asengeli na yango, baoyo bazali bana mibali pe bana basi na Nzambe. Mpo ókóma bongo, osengeli na bokutani oyo ya yo moko, bomoni, Eloko moko boye. Ata boni, oyebi ete Liloba ezali solo, oyebi ete Ezali sembo; kasi na ntango na bokutani, nsima omoni likambo yango kosalema, na ntango wana nde oyebi ete ozali na nzela malamumu. Bomoni? Pe, botala, ekozala ntango nyonso yengebene na Makomi. Ekolongobana mpenza na Makomi, mpamba te likambo oyo esalemaki bongo.

⁶⁶ Libondeli ya Amram elongobanaki mpenza na Makomi. Mabondeli na bango elongobanaki na Liloba na elaka. Nzambe alakáká ete akosala yango na ntango wana. Babondelaki mpo na yango, pe tala mwana moko kitoko abotamaki. Pe ba . . .

⁶⁷ Botala! Oo, ndenge nalingi likambo oyo! Bomoni, na eleko oyo Falo azalaki koboma bana nyonso, bomoni, azalaki koboma bango na—na mompanga, mompanga oyo ya basinzili; bango, bango nde bazalaki koboma bana mike yango na mimpanga, pe kobwaka mwa banzoto na bango epai na bangando, na lolenge ete bangando, mbala mosusu, bakómákí minene ndenge bazalaki kolia banzoto ya bana ya ba-Ebele. Kasi Biblia elobi, ete: “Baboti babangaki mobeko ya Falo te, oyo ya koboma bana.” Babangaki te. Bazalaki na nsomo te, mpo ete bamonaki eloko moko kati na mwana wana, mpo na kobanda. Bamonaki yango, ete ye azalaki eyano na mabondeli.

⁶⁸ Na bongo Mose azalaki na nyonso oyo na bomoi na ye eleká, boye Mose ayebaki ete atindamaki na ntina mpenza ya kosikola bana na Yisalaele.

⁶⁹ Bomoni, nyonso oyo eleká esanganaka. Ntango ozui eloko moko, oyo ekoki kotatolama na Biblia, koloba: “Likambo *boye* ekosalema,” pe esalami; “likambo *boye* ekozala na ntango boye,” pe esalemi; “pe likambo *boye* ekozala na ntango moko boye,” pe esalemi; na bongo nyonso wana ekosangana pe etalisi biso elilingi moko boye.

⁷⁰ Oo, boni losambo oyo na ntongo ya lelo, boni biso bato ya eleko oyo, Ndeko Neville, na ntango tozali komona suki na biso kokóma mpembe, mapeka na biso kogumbama, ntango tozali komona mokili kotepatepa pe kotengatenga boye, tokoki kotala nzinganzinga pe komona ete elaka ezali kobelemá! Ezali, e . . . Nakanisaka, mbala mingi, ete soki moto akokaki bobele kopimbwa pe kokota na mbala moko kati na Yango, pe kososola

Yango te, to kososola Yango kútu, pe kokota kati na Yango na mbala moko, ekotinda yo na Seko na seko, bobele na mwa eloko ya konetola ya boye! Kozanga ete ayeba, pe na mbala moko, oo, kokota na makambo oyo tosila komona, koyeba pe kososola, pe na mbala moko kokota mobimba na kati. Mobali wana, to mwasi wana, elenge mobali, to elenge mwasi, mbala mosusu akotombola bobele maboko pe akoloba: “Tokei, Nkolo Yesu,” bomoni. Oo, ndenge ngonga yango ekómí mpenza pene!

⁷¹ Lokola Mose ayebaki ete abotamaki na ntina wana, azalaki kotala libanda na maninisa pe komona ba-Ebele wana ndenge bazalaki koniokwama; azalaki kotala na Makomi, pe elobamaki: “Pe bakofanda kuna mibu nkama minei, bomoni, kasi Nakobimisa bango na loboko na nguya.” Na bongo ntango azongaki, nsima na ye kozua etinda pe kopakolama, ayebaki ete abotamaki. . . Pe kondima na ye etalaki, na nzela na kondima amonaki bato wana pe ayebaki ete bazalaki bana na Nzambe, mpo ete mokili. . . ete Li—Liloba elobaki bongo. Bazalaki bato ya mokili te, pe bazalaki lokola bamosusu te. Bakesanaki. Bazalaki bilema pe bilandálánda, mpo na—na bato na lokumu ya Ezipito; pe asengelaki kozala mwana na Falo, oyo asengelaki kokamata bokonzi, na nsima. Kasi, ye, eloko moko ezalaki kati na ye, ko—kondima ya solo oyo ezalaki kotala makambo wana te, lokumu oyo asengelaki kosangola. Azalaki kotala elaka na Nzambe, pe ayebaki ete ntango ezalaki kobeleva. Pe mobali wana asengelaki mpenza koyeba kokanisa!

⁷² Nakolinga kosolola na ye mpo na yango, mokolo moko, ntango nakokutana na ye na ngambo mosusu. Okoki koloba: “Oyo bolema, ndeko!” Te, ezali bongo te. Nakokutana na ye, na ngolu na Nzambe. Iyo, misié. Nakosolola na ye, mokolo moko, na Mose ye moko. Pe nakosepela kotuna ye, ndenge esalemaki, ntango amonaki ndenge alengelamaki!

⁷³ Ndenge atungisamaki, zabolo alobaki na ye: “Aa, bato bakondimela yo te. Ha. Eloko moko te ya motuya ezali kati na yango.”

⁷⁴ Kasi ntango momboto wana ekómákí na Bomoi kuna, eloko moko ebetaki ye pe ayebaki ete likambo moko elingaki kosalema. Ayebaki. Atalaki saa na ye pe amonaki soki ezalaki ngonga nini, pe ayebaki, akanisaki mingi ntango azalaki kotala. Na bongo ntango asangisaki nyonso oyo, makambo minene nyonso oyo amónáká; ntango ya Makomi, libondeli ya mama na ye ná tata na ye, pe mbotama na ye ya ndenge mosusu, mwana moko ndenge. Pe, nyonso oyo eleká, eloko moko ezaláká kati na ye.

⁷⁵ Boye akimi pe ameki kokanisa ete alingaki kosalela mayele oyo ayekolaki na kelasi ya sodá, mpo na kosikola bana, kasi elongaki te.

⁷⁶ Na bongo akei na biliki pe abali mwasi ki—kitoko ya Etiopia, pe babotaki mwana mobali na nkombo Gersom.

77 Pe mokoloko moko ntango azalaki kobatela etonga, na mbala moko amonaki nzete moko kopela na likolo ya ngomba, ezalaki kopela móto. Amataki kuna. Ezalaki mayele ya bongó te, ma—makanisi te, elili ya lokuta te, ekosa miso te, kasi kati na ye. . . Nzambe na Abalayama azalaki wana, kati na Pole, Likonzi na Móto kati na nzete, Móto wana, ezalaki lokola mbonge ezali komata, kasi ezalaki kobebisa nzete te. Pe Mongongo na Makomi, Mongongo na Nzambe, ebimaki kuna na kati, pe elobaki: “Naponi yo. Moto yango nde yo. Natelemisaki yo na ntina oyo. Nazali kotalisa yo awa, na nzela na bilembo, ete yo nde okokende kosikola bana mpo ete Liloba na Ngai esengeli kokokisama.”

78 Oo, Liloba na Ye mpo na lelo esengeli kokokisama. Tozali kobika na eleko yango. Ata soki nani mosusu alobi nini; Liloba esengeli kokokisama. Likolo na nse ekoleka, kasi Liloba na Ye te.

79 Boye, ntango Mose asangisaki nyonso oyo, pe amonaki likambo yango na ngambo nyonso, epakolaki kondima na ye. Amen! Ólálá! Oyo nde likanisi! Oyo, yango moko nde, yango moko, ndenge emonaki Makomi kotalisa semba epai na oyo yango ezalaki, ndenge Nzambe alobaki, pe elembo na yango ezalaki wana, epakolaki kondima oyo azalaki na yango kati na ye, mpo na kobanda mosala.

80 Esengelaki kosala biso nini? Tosengeli na mbongwana na mitema. Tosengeli na kolamuka. Nazali komilobela pe ngai moko. Bomoni? Nasengeli na kosukuma. Nasengeli na eloko moko boye. Nalobaki ete nazali komilobela na ntongo oyo, to na ntina na ngai moko. Na—na—nasengeli na ko—kolamuka.

81 Pe soki nakanisi elembo monene wana, nyonso mpenza etandamaki wana malamumu be, yango epakolaki kondima ya Mose. Pe, ólálá, amonaki ete ata eloko moko ezalaki te. . .

82 Ye oyo akimi longwa na Ezipito, ná, nzoka nde, akokaki kobandisa bo—botomboki to eloko moko boye, akokaki—akokaki kotelema pe kobandisa mbongwana kati na Ezipito, akokaki kozua limpinga ya basoda pe kobunda, kasi, bomoni, pe bato nkoto na nkoto bazalaki na ngambo na ye. Kasi na esika na yango, abangaki ata kosala bongo, ná mampinga na ngambo na ye.

83 Kasi sikawa ye oyo azongi, mibu ntuku minei nsima na yango, akómákí na mibu ntuku mwambe, bobele ná lingenda na loboko. Mpo na nini? Eloko oyo ezalaki kopela kati na motema na ye ekómákí solo. Na ntango wana asilaki kopakolama, pe ayebaki ete azalaki na YANGO ELOBI YAWÉ. Na ntango wana eloko ata moko te elingaki kopekisa ye. Asengelaki na mampinga te. Nzambe azalaki na ye elongo. Bobele yango nde asengelaki na yango; Nzambe elongo na ye.

⁸⁴ Oo, ntango oyebi ete Nzambe nde atindi yo mpo osala likambo moko boye, pe omoni yango kokende liboso, e—eloko ata moko te ekoki kozua esika na yango. Esili.

⁸⁵ Nazali komikanisela, mbala mingi, ntango Nkolo alobaki na ngai na ntina na makambo oyo esengelaki kosalema, nsima na yango nakei liboso pe namoni yango wana, ndenge. . . Oo, okomiyoka ndenge mosusu! Likambo yango esili kosimbama na maboko, esili, bomoni, mpamba te Nzambe nde alobi bongo.

⁸⁶ Nazali komikanisela, pe mingi kati na bino bobosani te, na ntina na mwana mobali oyo asekwaki na Finland, uta na bakufi, batutaki ye na motuka. Natelemaki wana pembeni na nzela, nabandaki kolongwa pene na mwana yango, nabalukaki pe natalaki na nsima. Pe eloko moko etiaki loboko na yango na lipeka na ngai, pe nakanisaki ete ezalaki Ndeko Moore, kasi ata moto moko azalaki pene na ngai te. Natalaki na nsima, pe nabwakaki miso likolo na ngomba oyo namonaki. Nalobaki: “Ee, nasila komona ngomba wana esika moko boye, kasi toyaki na nzela oyo te. Toyaki na nzela mosusu. Ngomba yango ezali wapi?”

⁸⁷ Natalaki pe namonaki motuka yango kuna na nse, epanzani; namonaki mwa mwana yango wana ná. . . atandamaki wana ná suki bakátá mi—mikuse, ndenge babengaka yango awa. Miso ebalukaki, lokola oyo ya Ndeko Way mokolo wana, ntango akweaki sénza. Pe mwa lokolo na ye etobolaki soséti, na bisika oyo mwa makolo na ye ebukanaki. Makila ezalaki kobimela ye na miso, na zolo, pe na matoi. Namonaki mwa patalo na ye mokuse; esimbamaki na babutó, na ye, *awa* pe na mompanzi ya mwa lokéto na ye; pe mwa basoséti na ye emataki, lokola basoséti ya milai oyo tozaláká kolata kala.

⁸⁸ Natambwisaki miso, pe esika yango ezalaki mpenza, mpenza ndenge Molimo Mosantu ayébísáká ngai mibu mibale liboso, ntango bino nyonso, na ekólo mobimba, bokomáká yango na ba-Biblia na bino, ete ekosalema. Oo, na esika wana, na ntango wana, likambo esimbami na maboko. Ata soki akufi ndenge nini, ata soki nani mosusu alobi nini; esili. Asengeli kosekwa!

⁸⁹ Nalobaki: “Soki mwana oyo asekwaki te uta na bakufi, na bongo nazali mosakoli ya lokuta, nazali etaliseli ya lokuta ya Nzambe. Mpamba te, na ekólo na biso, eleki mibu mibale, Ayebisaki ngai ete likambo oyo ekosalema. Pe kuna, batei oyo, pe bango nyonso, ekomami na lokasa ya ebandeli ya ba-Biblia na biso, pe yango oyo mpenza. Bótánga yango na lokasa oyo, ete ‘ekozala na ekólo moko, ya mabanga-mabanga, pe bongo na bongo, akokufa, pe na. . . akozala pembeni na nzela na ngambo ya mobali.” Nalobaki: “Yango wana. Eloko ata moko te ekoki kopekisa yango. Likambo yango esili kosimbama na maboko.”

⁹⁰ Kondima oyo ezalaki kati na motema na ngai epakolamaki. Oo, soki nazalaki ata na makoki ya kolimbola yango! Kondima

oyo Nzambe. . . oyo nazalaki na yango epai na Nzambe, oyo Azalaki koloba na ngai, pe ezangaki ata mbala moko te, Alobaki na ngai: “Likambo yango esimbami na maboko sikawa. Tala mpenza likambo oyo Natalisaki yo eleki mibu mibale, pe yango oyo na molongo mpenza. Likambo moko oyo osengeli kosala ezali bobele ete óloba liloba.” Pe mwana mobali yango asekwaki uta na bakufi. Bomoni?

⁹¹ Nazalaki kokanisa, wana nazalaki kotala Ndeko Fred Sothmann oyo afandi na nsima, ná Ndeko Banks Wood pe bamosusu. Mokolo moko, kuna na—na Balabala ya Alaska, ndenge natélémáká awa na ndakonzambe pe nayebisáká bino nyonso na ntina na nyama moko oyo azalaki lokola mboloko, ná maseke ya pouce ntuku minei na mibale [105 cm—N.D.T.], pe na ntina na ngombolo oyo azalaki na langi ya palata na eteni moko. Nakómáká kuna liboso ata mbala moko te, pe ete ba. . . ete nasengelaki kozua yango, pe ndenge elingaki kozala, bato boni balingaki kozala elongo na ngai, pe ndenge balingaki kolata. Boyebaki yango, bino nyonso, bapóso na bapóso liboso ete ékokisama.

⁹² Pe kuna, ntango nakómákí kuna, kozanga ete náyeba, nyama yango ezalaki wana. Napusanaki, pe—pe a. . . ekokaki kosalema te. Soki moto na bokila akoki koyeba, to soki azali koyoka bande oyo, ete okoki kopusana liboso na nyama te, akotelema mbala moko pe akimi. Kasi ye asalaki bongo te.

⁹³ Abakemi kuna na biró na ngai. Ngombolo na eteni ya langi ya palata abakemi pe kuna, ndenge moko mpenza. Pe—pe regle moko ezali wana, metre ruban, mpo na kotalisa mpenza molai na yango. Pe liseke ekondaka, penepene pouce mibale [5 cm—N.D.T.] to koleka, uta na ntango ezali naino mobesu na nzoto na nyama kino ntango ekokauka, kasi oyo ekondi ata moke te. Ezali ntango nyonso kaka pouce ntuku minei na mibale mpenza [105 cm]. Bomoni? Ngombolo na eteni ya langi ya palata alali wana, ezali mpenza na bolai ya pied nsambo [2,10 m], pe nyonso ezali ndenge moko mpenza, alali kuna sikawa.

⁹⁴ Kasi ntango moto oyo alobaki na ngai: “Sikawa, tala, Ndeko Branham, tozui nyama oyo olobelaki, kasi olobaki na ngai ete okozua ngombolo moko oyo azali na eteni ya langi ya palata liboso ete ókóma na nse na ngomba, ete ózónga esika bandeko bazali, esika ndeko oyo alati simisi ya mai na mpondu azali.”

⁹⁵ Nalobaki: “Ezali YANGO ELOBI NKOLO. Nzambe alobaki bongo.”

⁹⁶ “Kasi, Ndeko Branham,” alobaki, “nazali komona biloko nyonso oyo ezali nzinganzinga awa, bakilométele na bakilométele, eloko moko ezali te. Akouta wapi?”

⁹⁷ Nalobaki: “Ezali likambo na ngai te mpo nábéta ntembe. Nzambe alobaki bongo! Pe Azali Yawe-Yile. Akoki kobimisa

ngombolo moko kuna. Akokaki kotia moko kuna.” Pe Asalaki bongo. Pe ye wana. Ezali nde likambo oyo esimbami na maboko.

⁹⁸ Ntango Mose amonaki ete atelemisamaki na ntina wana, pe ete akutanaki miso na miso na Nzambe monene wana Oyo abiangaki ye, apakolaki ye, atalisaki lolenge na ye, pe alobaki na ye: “Oyo nde kobiangama na yo, Mose. Nazali kotinda yo, pe Nakotalisa yo nkembo na Ngai. Pe Ngai oyo, kati na nzete oyo ezali kopela móto. Kende kuna! Nakozala na yo elongo.” Asengelaki ata na lingenda te. Azalaki na Liloba, Liloba litatolami, pe ye wana akei. Epakolaki kondima oyo ezalaki kati na ye.

⁹⁹ Pe ezali kopakola biso ntango tozali komona ete tozali kobika na mikolo ya suka, komona ete bilembo nyonso oyo tozali komona ezali kokokisama, oyo elobami na Makomi, ete ekokokisama na mikolo ya suka; banda na Likolo, kino na bokonzi ya politiki, na lolenge ya bato, bato na mokili basili nsoni, kati na basi, ndenge bakobika na mikolo ya suka, ndenge mibali bakosala, ndenge mangomba ekosala, ndenge bikolo ekosala, pe ndenge Nzambe akosala. Pe tozali komona nyonso wana liboso na biso.

¹⁰⁰ Oo, ezali kopakola kondima na biso. Ezali komema biso kati na kolandana minene ya makambo. Bomoni? E—ezali kokabola biso na biloko mosusu ya mokili. Bomoni? Ata soki tozali moke ndenge nini, to soki tozali mingi te, ata soki baseki biso ndenge nini, batioli biso, ekobongola ata eloko te. Esili. Tozali komona yango. Eloko moko ezali na kati ya mitema na biso. Tobongísámá liboso mpo na komona eleko oyo, pe eloko moko te ekopekisa biso komona yango. Amen! Nzambe alobá yango awa. Esila—esila kosalema. Tozali komona yango. Oo, tozali kotonda Nzambe mingi mpo na yango! Oo, lisusu, ezali kotalisa polele kondima na moto ntango tozali komona makambo oyo kosalema awa.

¹⁰¹ Sikawa, awa lisusu totangi ete: “Mose atángáki ete kotiolama esika moko na Klisto eleki motuya monene na bibombelo nyonso ya Ezipito.” Boye, atángáki ko—kotiolama esika moko na Klisto.

¹⁰² Sikawa bomikanisela, “kotiolama esika moko na Klisto.” Bomoni, kotiolama ezali ntango moto azali kosalela Klisto. Soki olingami mingi na mokili, na bongo okoki kosalela te, ozali kosalela Klisto te. Te, okoki te. Mpamba te, bomoni, kotiolama etambolaka esika moko na Yango. Mokili etiolaka ntango nyonso.

¹⁰³ Kalakala, eleki mibu nkoto na nkoto, kotiolama ezalaki kotambola esika moko na Yango. Pe Mose asengelaki kokóma falo, ye nde azalaki falo oyo asengelaki koya nsima, azalaki mwana na Falo. Azalaki falo oyo asengelaki koya nsima, pe bato bazalaki kosepela na ye, nzoka nde “atalaki...” Kotánga elingi koloba “ko—kotala.” “Atalaki ete kotiolama

esika moko na Klisto ezalaki na motuya monene koleka nyonso oyo Ezipito ekokaki kopesa ye.” Ezipito ezalaki na maboko na ye. Kasi, nzoka nde, ayebaki ete kolanda nzela na Klisto ezalaki kotiolama, kasi asepelaki mingi koyeba ete eloko moko ezalaki kati na ye, oyo esalaki ete átála ete kotiolama oyo esika moko na Klisto, kotiolama esika moko na Klisto, kútu, ezalaki na motuya monene koleka lokumu nyonso oyo a—asangolaki. Azalaki na libula moko kati na ye oyo ezalaki monene mingi koleka oyo libula ya libanda epesaki ye.

¹⁰⁴ Oo, soki tokokaki kozala bongo lelo, pe kotika ete Molimo Mosantu apakola eloko oyo tozali na yango kati na biso, kondima wana, ékóma bomoi ya bonzambe, oyo ebulisami epai na Klisto!

¹⁰⁵ Na bongo, ná kondima ya ndenge wana oyo azalaki na yango, amonaki, pe atalaki ete kotiolama wana ezalaki lokumu.

¹⁰⁶ Lelo, moto akoki koloba: “He, ozali moko na bato wana, oyo wana?”

“Aa, aa, ee, aa.” Oyokeli yango mwa nsoni.

¹⁰⁷ Kasi ye atalaki ete ezalaki na motuya monene koleka mokili mobimba, mpamba te eloko moko ezalaki kati na ye, oyo akokaki kobimisa pe koloba: “Iyo, na—natali oyo. Oyo ezali na lokumu monene. Nasepeli kozala moko na bango.” Bomoni? “Nasepeli ete nátángama lokola mo-Ebele kasi mo-Ezipito te.”

¹⁰⁸ Baklisto basengelaki koloba ndenge moko lelo. “Nasepeli kotángama Moklisto, pe koboya biloko ya mokili pe molongo ya mokili. Kaka lokola moko kati na lingomba te, kasi lokola Moklisto oyo abotami lisusu, oyo azali kobika yengebene na Makomi. Ata soki babengi ngai ‘bilandálanda,’ ata na bato ya lingomba na ngai, ngai na—na—nakotángá yango ete ezali likambo monene—monene koleka soki nazalaki moto oyo alingami mingi koleka na engumba to na ekólo. Nakosepela kozala bongo na esika ya kozala Prezidá ya Amerika, to—to mokonzi ya mokili mobimba. Bomoni? Na—nazali kotángá yango na motuya mingi, mpo ete Nzambe, na mawa na Ye, liboso na kozalisama na mokili—mokili, Amonaki ngai, pe—pe Atiaki mwa momboto moko kuna na kati, na ntina ete kondima na ngai épimbwaka likolo na biloko ya mokili oyo. Pe sikawa Abengi ngai, pe na—natali esika na ngai.”

¹⁰⁹ Lokola Polo alobaki, ete atángákí mosala na ye na lokumu. . . bomoni, pe, oo, na lolenge ete Nzambe abéngáká ye mpo átika kozala molakisi monene lokola Gamaliele. Kasi Polo abéngámáká mpo ázala mbeka mpo na Klisto. Bomoni? Sikawa ndenge moko.

¹¹⁰ Botala, ná kondima ya ndenge wana, atiaki motema soki moke te na komona na ye, na oyo azalaki komona. Nzoka nde, azalaki komona eloko mosusu kuna te bobele ba—bapoti na potopóto, baómbo, na boloko, oyo bazalaki kobomama mikolo nyonso, kobetama fimbo, kotiolama, mpo na boyambi

ya losambo na bango, bazalaki “bilandálanda.” Pe falo moko afandaki na kiti na bokonzi, oyo ayebaki te pe azalaki kotala ata losambo na bango te. Ayebaki eloko moko te mpo na yango. Azalaki mopagano, na bongo a . . . Oyo nde elilingi ya lelo! Pe yango wana, losambo oyo ekesani. Pe soki—soki Mose oyo, atako afandaki na kiti moko ná prezidá, to—to ná moto monene, Falo, mpo ázua esika na ye na liwa na ye, pe akómákí mobange. Nzoka nde Mose amonaki ete kobiangama wana . . . Atalaki libanda, kaka na lininisa oyo Falo azalaki kotala na yango libanda, mpamba te azalaki kofanda na ndako na ye.

¹¹¹ Falo atalaki libanda pe amonaki bato oyo bazalaki kotombola maboko, bazalaki kokamata fimbo pe kobeta bango kino na liwa mpo ete bazalaki kobondela. Bazalaki kotobola bango mompanga mpo ete bazangaki, batosaki te na ntango moko boye, pe bazalaki kosalisa bango mosala na lolenge ete mwa nzoto na bango ezalaki kokweya na mabele, pe bazalaki kopesa bango bilei oyo ekoki ata te. “Ee, bakómákí bobele etonga na bilandálanda, lokola bato kutu te.”

¹¹² Nzoka nde Mose, ná kondima wana kati na ye, atalaki bango pe alobaki: “Bazali bato oyo bapambolami na Nzambe.” Amen. Nasepeli na yango. Ná kondima ya ndenge wana, miso na ye emonaki lokumu ya Ezipito te, etalaki elaka na Nzambe. Miso na ye ya mpongo ya kondima emonaki mosika koleka lokumu ya Ezipito. Ye, bomikanisela, akómí mpongo sikawa. Azali mosakoli, pe miso na ye ya mpongo ezali komona likolo na biloko wana. Oo ndenge nasepeli na yango! Ha! Ólalá.

¹¹³ Mbala boni lelo, lelo, Baklisto bazali kotia motema na biyokeli na bango, pe na oyo bazali komona, to oyo bazali kososola, na esika ya kondima na bango, kotia motema na oyo bazali komona na miso pe na lokumu. Lokola bino basi, nazongelaka ntango nyonso koloba na bino, ete bosengeli kotika suki na bino ékóla, bosengeli kopakola-pakola te, bosengeli kobika lokola bamama pe lokola Baklisto. Botala na balabala pe bokomona ete lelo basi bakómí kolata kozanga nsoni. Ee, okokanisa: “Ee, ye pe azali moko kati na lingomba, mpo na nini ngai násála bongo te?” Bomoni? “Pe akati suki na ye, mpo na nini—mpo na nini ngai nákokoka kosala bongo te? Ee, amonani ete azali ntango nyonso na bopolo pe na mayele, pe na bomoto oyo ngai kútu nazali na yango te. Ee, mpo na nini ngai nákokoka kosala bongo te? Nasengeli kosala yango.” Ntango osali bongo, olembisi kondima na yo. Omoni? Opesi kondima na yo libaku ya kokola te. Banda nde wana, ndenge nalobaki.

¹¹⁴ Moto moko alobaki: “Ndeko Branham, ekólo, bato, bazali kotanga yo lokola mosakoli. Osengeli kogangelaka basi ndenge wana te, ná mibali, mpo na makambo oyo. Yo, osengelaki kolakisa bango ndenge nini ko—kosakola pe koyamba makabo.”

115 Nalobaki: “Ndenge nini nakoki kolakisa bango algebre na ntango oyo bayebi naino ata ABC na bango te?” Bomoni?

116 Sikawa banda nde na yango. Mipetola na lolenge ete ntango ozali kotambola na balabala ózala lokola Moklisto, na ndenge nyonso, bomoni, nsima na yango banda kobika lokola Moklisto. Bomoni? Pe okoki te kosala yango yo moko kati na yo. Esengeli ete Klisto akota kati na yo. Soki momboto wana ezali kuna na kati, pe Pole wana ebeti yango, ekozua Bomoi. Soki ezui Bomoi te, boye eloko moko ezalaki kuna te mpo na kozua Bomoi. Mpamba te, solo mpenza etalisamaki polele na bamosusu, bomoni, ekozua Bomoi mbala moko ntango Pole ebeti yango.

117 Ezali mpamela epai na basi, nayebi, baoyo bazali koyoka bande oyo, to baoyo bakoyoka yango. Ezali mpamela epai na yo, ndeko mwasi. Esengeli kozala bongo. Esengeli kozala bongo, mpo ete ezali komonana. Nazali na ntina na oyo osila kosala te; ekoki kozala ete ozalaki mosambeli, na bomoi na yo mobimba, ekoki kozala ete ozalaki kofanda na ndakonzambe, tata na yo akoki kozala motei, to mobali na yo akoki kozala motei; kasi na ntango oyo ozali kotosa Li—Liloba na Nzambe te, ezali kotalisa ete Bomoi ezali kuna te. Ntango omoni eloko yango kotalisama, pe Bomoi ya Molimo Mosantu, tala Yango malamú ntango Ezali kobeta bamosusu. Tala oyo bazali kosala, soki Ezali komema yango epai na bango. Komituna te mpo na nini. . .

118 Oyo—oyo nde mpamela epai na ba-Falisai wana, oyo babengaki Yesu, ntango Asosolaki makanisi na bango, Abengaki bango, “Bezebula.”

119 Kasi mwa mwasi ya ndumba wana alobaki: “Ee, Mobali oyo azali Masiya. Makomi elobi ete Akosala yango.” Bomoni, momboto oyo eponámá ezalaki wana. Pe ntango Pole ebetaki yango, ezuaki Bomoi. Okoki kozipa yango te. Okoki kobomba Bomoi te.

120 Okoki kozua beton pe kosopa yango likolo na matiti, pe koboma yango na eleko ya mpio. Na eleko ekobanda molunge oyo ekolanda, matiti mingi ekozala wapi? Pembeni-pembeni na beton yango. Mpamba te, momboto oyo ezali na bomoi na nse na libanga wana, ntango moi ebandi kongenga, okoki kopekisa yango te. Ekomipasolela nzela kuna na nse, ekobima kino pembeni na yango pe ekotombola motó na yango mpo na nkembo na Nzambe. Bomoni, okoki kobomba bomoi te. Ntango moi ebeti bomoi ya milona, esengeli kozua bomoi.

121 Pe ntango Molimo Mosantu ebeti Bomoi ya Makomi oyo ezali kati na moto, ekobota mbuma na yango mbala moko. [Ndeko Branham abuki misapi na ye—N.D.E.] Bomoni?

122 Na bongo ata soki ozali na bosembo pe na bosolo ndenge nini, ata soki olobi ete ozali na yango te, pe olobi, okoloba ete ba. . . Basi oyo balataka bi—bilamba mabe oyo pe biloko mosusu kuna libanda, bazali mpenza basi oyo balongolaka bilamba wana ezali

bango kobina, ya balabala. Nzoka nde, ondimaka te ete ozali moko na bango, okoki kondima te. Okoki kotalisa polele ete okwei na ekobo te, kasi, na Buku na Nzambe, ozali kosala ekobo. Yesu alobaki: “Ye nani akotala mwasi na mposa mabe na ye, asili kosala na ye ekobo na motema na ye.” Pe yo omitalisaki ndenge wana. Omoni, okoki komona yango te bobele soko Bomoï wana ezali kuna.

¹²³ Otali moto mosusu, otali ye pe olobi: “Ee, nayebi Ndeko mwasi Jones. Ndeko mobali Jones azali . . . Azali motei. Mwasi na ye asalaka *boye* na *boye*.”

¹²⁴ Oyo likambo *boye* esalaka etali ngai te; Oyo ezali Liloba. Yesu alobaki: “Liloba ya moto nyonso ézala lokuta, pe oyo ya Ngai ézala solo.” Ezali nde Biblia. Pe ntango Pole wana ebeti yango mpenza, esengeli kozua Bomoï. Esengeli bobele kozua Bomoï.

¹²⁵ Boye, miso malamau ya Mose, miso na ye ya mpongo, etalaki mosika koleka lokumu ya Ezipito.

¹²⁶ Mondimi Moklisto ya solosolo lelo, ata soki lingomba elobi nini, ata soki moto mosusu alobi nini; ntango Pole wana ebeti yango, akomona kotatolama mpenza ya Nzambe, Likonzi na Móto yango kotelema wana, bilembo pe bikamwa oyo elakámá, Liloba kotiamana wana, pe ekozua Bomoï; ata soki ezali moke ndenge nini, pe ata soki bazali moke ndenge nini. Etonga ya Nzambe ezalaka ntango nyonso na bato moke. Bomoni? “Banga te, e—etonga moke, Tata na bino asepeti kopesa bino Bokonzi.” Bomoni? Bazali kososola yango. Nzambe asengeli kotinda bango baya awa uta na bibongiseli nyonso, na milongo nyonso ya bisika nyonso, mpo bamona Yango, soki babongisama mpo na Bomoï.

¹²⁷ Botala mobange Simeona, oyo abongísámáká mpo na Bomoï. Ntango Masiya ayaki na tempelo, na lolenge ya bebé na maboko ya mama na ye; Simeona azalaki kotanga, na eteni moko boye kati na tempelo. Molimo Mosantu atelemisaki ye, mpamba te azalaki kozela. Bomoï wana ezalaki kati na ye. Alobáká: “Nakomona kufa te kino ekomona ngai Klisto na Nkolo.” Pe Klisto na Nkolo ayaki na tempelo. Molimo Mosantu akambaki ye uta na esika na ye ya mosala, abimaki, atambolaki kino akómákí wana, akamataki bebé yango, pe alobaki: “Otika—otika moómbo na Yo kokende na kimia, mpo ete miso na ngai mamoni kobikisa na Yo.”

¹²⁸ Mobange mwasi mokufeli miso moko azalaki na coin, nkombo na ye Ana, azalaki kosalela Yawe butu pe moi. Ye pe azalaki kosakola, pe koloba: “Masiya azali koya. Nazali komona Ye koya.” Nzoka nde, azalaki mokufeli miso. Kaka na ntango yango, ntango Ayaki wana . . . Mwa Bomoï oyo ezalaki kati na ye, oyo ezaláká kosakola ete: “Ekosalema! Ekosalema! Ekosalema!” Na bongo, kaka Bomoï wana, Pole ekotaki na ndako, na lolenge ya Bebé, lokola “mwana ya makángo,” azingamaki na bilamba,

azalaki koleka kati na ndako. Pe Molimo Mosantu asimbaki mobange mwasi mokufeli miso yango, ayaki na nzela na Molimo, akambamaki pe alekaki kati na bato, pe atelemaki liboso na Bebé yango; apambolaki mama pe apambolaki Bebé, pe alobaki makambo oyo esengelaki koya nsima mpo na Ye. Bomoni, abongísámáká mpo na Bomoi! Bomoni?

129 Botala bango, bazalaki ata zomi na mibale te. Bobele milimo mwambe nde ebikaki na ntango na Noa, ata mingi kútu te, kasi baoyo nyonso babongísámáká mpo na Bomoi bakotaki na eleko wana. Bomoni ndenge Molimo Mosantu asalaka na eleko moko na moko, Abendaka bato.

130 Sikawa tomoni ete kondima ya Mose ememaki ye ete atala makambo oyo elingaki koya, oyo ezalaki te. Bótálaka nde lobi lokoya na esika ya kotala lelo. Bótálaka nde elaka na esika ya kotala lokumu. Bótálaka nde bato na esika ya kotala ebongiseli. Bomoni? Nzambe nde asalaki bongo.

131 Lota amonaki lokumu ya bofuluki na Ezipito, to na Sodoma. Lota amonaki makoki ya—ya...ya mbongo mi—mingi. Lota amonaki bofú-...makoki, ntango abwakaki miso na Sodoma pe amonaki ete akokaki kokóma... Lokola azalaki mo-Ebele, ete akokaki kokóma moto monene kuna, mpo ete azalaki moto na mayele mingi, pe mwana na ndeko ya Abalayama, na bongo aponaki kokende na ngambo ya Sodoma. Mayele ya Lota ememaki ye ete ámóna lokumu ya—ya bofúlu. Mayele ya Lota ememaki ye ete ámóna lipamboli ya—ya lokumu. Kasi, kondima na ye elembaki mingi mpo na yango, amonaki móto oyo elingaki koboma lolenge ya bomoi wana te.

132 Pe bato bakómí nde bongo lelo. Bazali komona makoki ya kokóma bandimi ya ebongiseli moko ya monene, bazali komona makoki ya kozala na molongo ya bato minene ya engumba, kasi bazali komona te makok-... Bazali komona te ete kondima na bango ezali kolemba. Botika ngai nazongela yango mpo esosolama mabe te. Basi lelo, bango, ndenge nalobi, balingi ko—balingi kosala makambo lokola bato minene ya cinema. Lelo mibali balingi kosala lokola basani ya televizió.

133 Lelo ezali komonana lokola ete batei balingi kokómisa mangomba na bango lokola bandako moko boye ya soloka ya mikolo oyo, ná bandimi pe bongo na bongo. Bazali komona makoki mbala mosusu ya kokóma mokengeli to mokengeli mokonzi, to mokonzi moko boye, soki azali na boyokani na lingomba; bazali kosundola Makomi, wana Ezuami mpenza liboso na bango, etatolami mobimba na Nguya na Nzambe, pe na Liloba ya bomoi ya Nzambe oyo ezali kobika kati na bato. Nzoka nde, baboi Yango. Balobaka: “Toboi kosangana ná eloko ya ndenge Wana.” Ekolongola bakalati na bango ya lingomba. Ekolongola molongo na bango na mangomba ebongisami. Nzoka nde bazali bato na bosembo, lokola Lota, oyo afandaki na

Sodoma, oyo ayebaki ete ezalaki mabe. Bomoni? Bomoni? Bazali kosala nini ntango bazali kosala bongo? Bazali kolembisa mwa kondima oyo bazalaki na yango mpenza. Ekoki kotambola te.

¹³⁴ Na bongo, Mose asundolaki yango, pe a . . . kondima na ye elembisaki mokili.

¹³⁵ To kondima na yo ekolembisa lokumu, to lokumu nde ekolembisa kondima na yo. Boye, osengeli kopona moko to mosusu. Pe bozali komona ete Biblia ebongwani te. Nzambe abongwani te. Azali Nzambe oyo abongwanaka te.

¹³⁶ Pe sikawa tozali komona, lelo, ete bato ya lelo, bomoni, bazali koluka makambo ya minene, bibongiseli ya minene. “Nasambelaka na lingomba *Boye*.” Bomoni? Bakendaka kuna, pe, botala, bokeseni ezali te ná bato ya balabala. Biloko mosusu ezali kuna te. Bazali na mwa eloko moko ya mayele ya bongó, pe bazali kokoba. Soki olobi na ntina na lobiko na nzoto kouta na Nzambe, Likonzi na Móto, Pole na Nzambe, bango bakoloba: “Wana ezali bolema.”

¹³⁷ Mokolo moko, moto moko akamataki fotó ya Mwanje na Nkolo, azalaki motei ya Batiste, pe atiolaki Yango. Bomoni, ezali—ezali nde kotuka. Bomoni? Bolimbisi ezali te mpo na yango.

¹³⁸ Yango nde oyo Yesu alobaki, bomoni. Ezali nde kotuka; na ntango oyo bozali komona Ye kosala kaka misala yango oyo Klisto asalaki. Pe Alobaki . . . Na ntango oyo bamonaki misala wana kati na Klisto, Ye azalaki Mbeka, pe babengaki Ye “Belezebula, molimo mabe,” mpamba te, mpo Azalaki kosala bongo. Pe sikawa balobaka . . . Alobaki: “Nalimbisi bino mpo na yango. Kasi ntango Molimo Mosantu akoya kosala kaka likambo yango, soki olobi likambo moko kotelemela Yango, ekolimbisamela yo soko moke te, ézala na ekeke oyo to na ekeke ekoya.” Bomoni? Liloba moko mpamba, yango nde nyonso oyo osengeli koloba mpo na kotelemela Yango. Bomoni? Pe na bongo . . .

¹³⁹ Mpamba te, soki Bomoi wana, soki obongísámá mpo na Bomoí na Seko, na bongo Bomoi yango ekobima pwsa ntango okomona Yango. Okoyeba Yango, lokola mwa mwasi wana na liziba, pe—pe bamosusu. Kasi soki ezali kuna te, ekoki kozua Bomoi te, mpamba te eloko moko ezali kuna te mpo na komema Bomoi. Ndenge mobange ya mama na ngai azaláká koloba: “Okoki kozua makila kati na mbala te,” mpamba te makila ezalaka kati na yango te. Sikawa, ezali ndenge moko.

¹⁴⁰ Pe ekolembisa mwa kondima oyo ozali na yango. Lota amonaki lokumu, kasi azalaki na kondima oyo ekoki te mpo na komona móto oyo elingaki kobebisa lokumu ya ndenge wana.

¹⁴¹ Nazali komituna soki lelo tozali na yango? Nazali komituna soki biso, ee, lokola mwasi oyo azali koluka lokumu, oyo alingi kosala makambo lokola oyo ya ba—basi mosusu na lingomba,

soki bamoni ete bazali koluka ko—kosala lokola bamosusu. Ba—bazali komona makoki ya kozala mwasi ki—ki—kitoko koleka, na komipakola-pakola. Bazali komona makoki ya kozala basi kitoko koleka na komíkómísáká lokola bilenge, na kokátáká suki na bango pe kosáláká lokola bamosusu, to bato minene ya cinema. Kasi nazali komituna soki yango elembisi kondima na bango te, koyeba ete Biblia elobi ete “mwasi oyo akosala bongo azali mwasi oyo azang-. . . azangi lokumu,” pe, “mwasi oyo akolata elamba ya mobali, azali na mbindo na miso na Nzambe,” bapataló, pe bongo na bongo, ná bakupé oyo bakómí kolata. Pe—pe ekómi mpenza makasi na lolenge ete ekómi momeseno ya bato ete basalaka bongo. Nazali komituna soki bazali kolembisa mwa kondima moke mpenza oyo bozalaki na yongo te, ya kokende ata na ndakonzambe, bomoni. Esalaka nde bongo.

¹⁴² Lota asáláká bongo, pe elembisaki ye, pe elembisaki bato na ye kuna. Bamonaki yango te.

¹⁴³ Kasi Abalayama, noko na ye, ná kondima oyo e—etatolamaki, atalaki lokumu te, alingaki kozala na likambo na yango te, atako asengelaki kobika na mpasi pe kobika ye moko. Pe Sara abikaki na biliki na esika ya mpasi, na mabele makobotaka malamumu te. Kasi batalaki lokumu to makoki ya kokóma na lokumu te.

¹⁴⁴ Sara, mwasi oyo alekaki kitoko na ekólo wana, Biblia elobi bongo. Azalaki kitoko, kitoko koleka basi nyonso. Kasi atikalaki ata kotikala pe atosaki mobali na ye, na lolenge ete azalaki ata kobenga mobali na ye “nkolo,” Biblia elobi mpo na ye, kino na—na Kondimana na Sika; elobi: “Bozali bana na ye ya basi, na ntango nyonso oyo bokotosa kondima.” Bomoni, azalaki kobenga mobali na ye “nkolo” na ye.

¹⁴⁵ Pe Mwanje na Yawe ayaki kotala tempelo na bango pe. . . to mwa hema na bango kuna, pe Asololaki na bango. Bazalaki ata na ndako ya kofanda te; bazalaki kofanda na mabele makobotaka malamumu te. Pe yango wana. Bozali komona mokolo yango kozonga lisusu, ndenge ezaláká mpenza na eleko wana?

¹⁴⁶ Boye, Mose ná kondima na ye monene, azalaki pe na makoki ya koloba “te” na makambo oyo ya ekeke wana, pe ya kopona malamumu. Aponaki koniokwama elongo na bato na Nzambe. Aponaki kotambola elongo na bango. Mpo na nini? Kondima na ye! Amonaki elaka. Amonaki ntango ya suka. Amonaki eleko oyo ezalaki koya, pe atikaki kondima na ye na bonsomi. Pe azalaki kotia bokebi ata moke te na oyo miso na ye ezalaki komona kati na makoki wana, ete azalaki falo pe ete alingaki kokóma falo. Azalaki kotala sémba eleko oyo ezalaki koya.

¹⁴⁷ Oo, soki bato bakokaki kosala se bongo, komona ekeke oyo te. Soki otali ekeke oyo, okopona yango. Zipa miso na yo na yango, pe tala elaka na Nzambe, na ekeke oyo ekoya.

¹⁴⁸ Na kondima na ye, azalaki na makoki ya kopona. Aponaki solo kobengama mwana na Abalayama, pe aboyaki kobengama mwana na Falo. Akokaki kosala yango ndenge nini, na ntango oyo bato nyonso kati na bokonzi. . . Ezipito ezalaki kokonza mokili. Ye nde azalaki mokonzi ya mokili, pe azalaki elenge mobali ya mibu ntuku minei, wana abelemaki mpo na kozua kiti na bokonzi. Kasi atalaki ata moke te mayel- . . .

¹⁴⁹ Botala basi oyo balingaki kozala nzinganzinga na ye, mokolo na mokolo, ebele mpenza. Botala lokumu; azalaki kofanda mpo na komela vino, kotala basi kolongola bilamba liboso na ye, wana bazalaki kobina, pe bazalaki kopepa ye mopepe na. . . Basi bazalaki kouta na mokili mobimba, ná pauni pe biloko ya motuya, mampinga na ye ezalaki libanda. Eloko bobele moko oyo asengelaki kosala ezalaki ete afanda mpo na kolia bilei na ye kitoko, pe aloba: “Tinda. . . tinda mampinga nimeló *boye* na esika *boye*, mpo babotola ekólo wana. Nabanzi ete nalingi ete ékóma ya ngai.” Yango nde bobele oyo asengelaki kosala. Kofanda wana, bápepa ye mopepe, pe kofungola monoko; kotika ba—basi kitoko ya mokolo wana, oyo balongolaka bilamba na bango, ete basopa vino na monoko na ye, baleisa ye bilei na ye wana bazingi ye na maboko na bango, bango nyonso bazalaki basi oyo baleki kitoko na mokili. Lokumu nyonso oyo ekokaki kozala, ezalaki wana pene na ye.

¹⁵⁰ Kasi ye asalaki nini? Alongolaki miso likolo na yango. Ayebaki ete móto ebelemaki mpo na kotumba yango. Ayebaki ete kufa ezalaki na ngambo oyo kuna. Bomoni? Ayebaki ete ezalaki bongo. Abwakaki miso epai na bato oyo batiolami pe baboyami, pe, na kondima, aponaki kotirolama ya Klisto pe amitangaki: “Nazali mwana na Abalayama. Nazali mwana na falo oyo te. Atako bokómísi ngai mokengeli, to mosungi, to evéke mokonzi, to pápa, nazali mwana na ye te. Nazali mwana na Abalayama, pe nakabwani na biloko ya mokili.” Amen, amen, pe amen! Na kondima, asalaki bongo!

¹⁵¹ Atiaki lokumu pembeni. Atiaki makoki ya kokóma mokengeli oyo asengelaki koya nsima, atiaki ma—makoki ya kokóma evéke mokonzi oyo asengelaki koya nsima, to mokengeli mokonzi oyo asengelaki kozua bokonzi na kopona oyo esengelaki koya nsima, to nini, atiaki yango pembeni. Aboyaki kotala yango.

¹⁵² “Sikawa, soki nakómi mokengeli, ntango nakokota, bato bakoloba: ‘Tata mosantu,’ to—to ‘Molakisi *Songolo*,’ to—to—to ‘Mpaka *Songolo*.’ Ndenge bakobanda, batei nyonso na mayangani, bakobanda kosimba-simba ngai na mokongo, pe bakoloba: ‘He, yo, moto wana azali na eloko, nayebisi yo. Oo, sh-sh-sh, fanda kimia, mokengeli azali koya, omoni. Oyo ye alobi, yango nde mobeko. Bomoni, *Songolo* azali koya.’” Bato bakosala mibembo na mpepo uta na mokili mobimba mpo na kozala. . . kotala pápa, pe kopwepwa ye na lokolo, na mpété pe bongo na

bongo. Ete, makoki epesameli ba-Katoliko, makoki epesameli ba-Misioni, ya kokóma mokengeli to mokengeli mokonzi, to mokonzi moko boye, moto monene na ebongiseli moko boye.

¹⁵³ Nzoka nde, atalaki, kasi, bomoni, liso na kondima etalaka likolo na oyo wana. Pe okomona suka na yango mosika kuna na nse, oyo, Nzambe alobi ete nyonso wana ekobebisama. Kondima, liso wana ya mpongo, ekotombola yo likolo na yango, pe okomona lobi lokoya, lelo te, pe aponaki kobengama mwana na Abalayama.

¹⁵⁴ Falo, lokola azangaki kondima, amonaki bana na Nzambe lokola “bilandálanda.” Lokola azangaki kondima, akómísákí bango baómbo mpo ete azalaki kobanga oyo azalaki koloba te. Azalaki kobanga Nzambe te. Azalaki kokanisa ete azalaki nzambe. Azalaki kokanisa ete banzambe na—na ye oyo azalaki kosalela, ye lokola mokengeli, lokola mokonzi ya bakengeli bakonzi, ete banzambe na ye nde basalaki bongo. “Eloko *oyo* ezali na ntina te,” boye akómísákí bango baómbo. Azalaki koseka bango, kotiola bango. Mpenza ndenge bato bazali kosala lelo, ndenge moko mpenza.

¹⁵⁵ Kondima ya Mose emonaki bango na mboka na elaka, lokola libota oyo epambolami. Ekoki kozala etumba moko monene mpo na kokómisa bango na elaka, kasi Mose aponaki kokende elongo na bango. Nakoki mpenza kouwela likolo na yango, kasi ntango na ngai ekómí kosila. Bomoni?

¹⁵⁶ Botala, ekokaki kozala mpasi mpo na kobongola makanisi ya bato wana. “Osengeli kokende kobika elongo na bango, osengeli kokóma moko na bango, pe bango basila kokóma na mayele mingi na lolenge ete okoki koningisa bango te. Bomoni? Kasi esengeli ete eloko moko esalema kuna. Esengeli ete bikamwa etalisama polele liboso na bango. Ekozala likambo moko makasi. Bibongiseli ekoboya yo, pe makambo oyo nyonso ekosalema. Ezali—ezali makambo ya nsomo, oyo osengeli kosala, kasi ata bongo, pona.”

¹⁵⁷ “Nazali moko na bango.” Iyo. Kondima na ye nde esalaki bongo. Kondima na ye ebimisaki lotótó ya móto. Iyo, misié. Amonaki yango. Ezalaki likambo moko ya mpasi mpo na kokómisa bango na elaka wana, kasi aponaki kokende elongo na bango, ata bongo. Atalaki oyo basalaki ye te, pe ndenge baboyaki ye te, akendeki ata bongo. Alingaki kobima elongo na bango.

¹⁵⁸ Sikawa nabanzi ete bozali kososola. Malamu. Kende elongo na bango, ata bongo. Kómá, zalá na bango, ya solo, mpo ete ezali lotómo na yo. Ekoki kozala etumba monene, pe mpasi mingi oyo osengeli koleka na yango, kasi kende ata bongo.

¹⁵⁹ Kasi kondima na ye ekambaki ye ete apona Liloba, kasi lokumu te. Akamataki Liloba. Yango nde oyo kondima na Mose esalaki. Ntango kondima etali ngambo oyo ya mabe koleka epai na Nzambe... Bomikanisela, na ngambo oyo lokumu

ezalaki, mokili, oyo elekaki likolo, mokonzi ya mokili. Bongo oyo balakami na Nzambe bazalaki wapi? Na libulu ya potopóto, bapoti na potopóto.

¹⁶⁰ Kasi ntango kondima, ntango kondima etali ngambo oyo ya mabe koleka epai na Nzambe, etangi yango monene pe na motuya koleka oyo eleki malamú oyo mokili ekoki kotalisa. Iyo, misié. Ntango kondima etali yango, ntango kondima emoni yango, ntango kondima na Liloba emoni Liloba komonisama, eleki lokumu nyonso, boepiskopo pe nyonso mosusu oyo okoki kolobela. Kondima nde esalaka bongo. Bomoni? Okoki komona oyo eleki mabe, oyo etiolami, oyo eboyami, ata nini; ata soki ekómí mabe ndenge nini, nzoka nde kondima ekotángá yango likoló mingi koleka eloko oyo eleki kitoko oyo mokili ekoki kobimisa. Amen! Yango nde lolenge oyo toyembaka nzembo yango: “Nakotambola elongo na bato moke ya Nkolo oyo batiolami.” Bomoni? Ólalá!

¹⁶¹ Mpamba te, bomoni, kondima emonaka oyo Nzambe alingi ete esalema. Oo, nabanzi ete likambo oyo ezali kokota. Kondima etalaka eleko na yango te. Kondima emonaka oyo *awa* te. Kondima etalaka mpo na komona oyo Nzambe alingi, pe esalaka kokokana na yango. Yango nde oyo kondima esalaka. Emonaka oyo Nzambe alingi, oyo Nzambe alingi ete esalema, pe kondima esalaka na nzela na yango.

¹⁶² Kondima emonaka mosika. Ekitisaka miso na yango te. Etikalaka kotala eloko oyo ezali kosósolo. Amen! Mobeti masasi nyonso ya malamú ayebi yango. Bomoni? Ete, emonaka mosika. Ezali—ezali matalatála ya komonisa mosika. Ezali ziméle, batalaka na yango pembeni *awa* te. Basalelaka ziméle te mpo na kotala pe koyeba ekómí ngonga nini; bomoni, basalelaka yango te. Kasi basalelaka ziméle mpo na kotala mosika mpenza.

¹⁶³ Pe kondima esalaka bongo. Kondima ekamataka ziméle ya Nzambe, nyonso mibale, ngambo nyonso mibale, Kondimana na Sika ná oyo ya Kala, pe emonaka elaka moko na moko oyo Apésá. Kondima emonaka yango mosika kuna, pe kondima eponaka yango kozanga kotala oyo eleko na yango elobi *awa*. Atalaka na suka. Akitisaka miso na ye te mpo na kotala *awa*. Atalaka mosika kuna. Atiaka ntango nyonso elembo ya katikáti ya matalatála likolo mpenza na Liloba. Yango nde oyo kondima esalaka. Kondima oyo ezali kati na moto nde esalaka makambo wana.

¹⁶⁴ Sikawa botala. Oyo falo abengaki, na kobenga, oyo Falo abengaki *monene*, Nzambe abengaki yango “mbindo!” Falo akokaki koloba: “Tala, Mose, awa, ee, yo nde okokóma falo nsima. Na—nakopesa nkunda oyo epai na yo ntango nakokende. Nakopesa yo lingenda oyo. Ezali ya yo. Omoni? Na bongo, oyo ezali eloko monene. Okokóma moto monene, Mose. Yo nde okokóma mokengeli. Okokóma *oyo, oyo kuna, to oyo mosusu.*

Kotika biso te. Tikala awa.” Kasi, bomoni, abengaki yango *monene*, kasi Nzambe alobaki ete ezali “mbindo!”

¹⁶⁵ Sikawa, bino basi bokanisa naino mwa moke, bino mibali pe. Oyo mokili ebengaka *monene*, Nzambe abengaka yango “bosoto.” Biblia elobi te ete: “Ezali mbindo mpo na mwasi kolata bilamba ya mobali?” Pe bokanisi ete bozali na mayele mingi na kosáláká bongo. Bomoni? Bozali bobele kotalisa nzoto ya bomwasi mpo na zabolo, pe esili. Boye, bósálaka bongo te.

¹⁶⁶ Pe bino mibali oyo bolandaka biloko ya mokili, bozali kotonda mpo na kowela yango! Pe bino mibali oyo bozangi mpiko oyo ekoki mpo na kopekisa basi pe bana na bino ete batika kosala bongo, nsoni na bino! Pe bozali komibenga bana na Nzambe? Mpo na ngai, ezali lokola bosodóma. Bomoni? Ezali mpo na kozokisa mitema na bino te, kasi mpo na koyebisa bino Solo. Bolingo esembolaka. Esembolaka ntango nyonso. Mama oyo aboi kobatela mwana na ye, aboi kosembola ye pe kobeta ye na masoko, mpo na kosala ete atosa, azali mpenza mama malamumu te mpo na ye. Ya solo.

¹⁶⁷ Sikawa, botala oyo ekosalema sikawa. Mose amonaki yango, na nzela na emononeli na ye. Pe Falo alobaki ete: “Oyo ezali eloko monene.” Nzambe alobaki: “Ezali mbindo.” Boye Nzambe. . . Mose aponaki oyo Nzambe alobaki.

¹⁶⁸ Sikawa, botala, kondima emonaka oyo Nzambe alingi ete omona. Bomoni? Kondima emonaka oyo Nzambe amonaka.

¹⁶⁹ Kasi mabanzo pe biyokeli emonaka oyo mokili elingi ete omona. Botala mabanzo: “Ee, ezali bobele eyokeli ya bomoto. Ezali bobele—bobele mabanzo nde esali ete oyo. . . Ee, *oyo* pe ezali kaka malamumu ndenge moko te?” Bomoni? Ezali se ndenge moko, soki osaleli biyokeli oyo ekeseni na Liloba, bomoni, na ntango wana yango nde oyo mokili elingi ete omona.

¹⁷⁰ Kasi kondima etalaka oyo wana te. Kondima etalaka oyo Nzambe alobi. Bomoni? Boyebi, bobwaka mabanzo.

¹⁷¹ Mabanzo, eyokeli ya mabanzo, emonaka oyo mokili elingi ete omona, ebongiseli monene. Ee, ozali Moklisto? “Oo, na—nazali mo—Presbyterien, Metodiste, mo—Luterien, Pentekotiste, pe soki nini lisusu. Nazali *oyo*, *oyo kuna*, to *oyo mosusu*.” Bomoni, oyo wana, ezali nde biyokeli. “Nasambelaka na lingomba ya yambo, omoni. Oo, nazali mo—Katoliko. Nazali—nazali *songolo*, *pakala*.” Bomoni, bolobaka bongo. Nzoka nde, oyo wana, ezali biyokeli. Bosepelaka koloba bongo mpo ete ezali ebongiseli, eloko moko ya monene. “Ee, to—to—tozali na bandimi ebele, penepene, koleka mangomba nyonso na mokili, omoni. Bisó. . .”

¹⁷² Kasi Lingomba ya solosolo ezali bobele moko, pe bakotaka kati na Yango te. Babotamaka nde kati na Yango. Bomoni? Pe soki obotami kati na Yango, Nzambe na bomoi Ye moko akosala na nzela na yo, pe Akomitalisa. Bomoni? Kuna nde epai Nzambe afandaka, kati na Lingomba na Ye. Nzambe akendaka

na Losambo mikolo nyonso, Afandaka mpenza na Losambo. Afandaka kati na bino. Bozali Lingomba na Ye. Bino nde Lingomba na Ye. Bino nde Mongombo oyo Nzambe afandaka kati na yango. Bino nde Lingomba na Nzambe na bomoi, yo mpenza. Pe soki Nzambe na bomoi afandi kati na ezali na Ye ya bomoi, boye misala na yo ezali ya Nzambe; soki ezali bongo te, boye Nzambe azali kuna na kati te. Akoki kosalisa yo misala ya ndenge wana te, na ntango oyo Alobi awa kati na Liloba, oyo ezali mwango na Ye: “Kosala bongo te,” kasi yo ozali kosala bongo. Bomoni, ezali mabe. Soki oboyi yango, boye ezali kotalisa ete Bomoi ezali ata kati na yo te. Bomoni? Ya solo.

¹⁷³ Kondima ekambaki Mose na nzela ya botosi. Botala, Mose asali. . . Elenge Falo ye wana, elenge Mose pe ye wana, bango mibale bazui libaku. Mose amonaki kotiolama ya libota, pe atángákí yango na motuya monene koleka nyonso oyo Ezipito ezalaki na yango. Pe ye, lokola akambamaki na kondima, alandaki oyo kondima na ye ezalaki koloba kati na Liloba, ekambaki ye na nzela ya botosi, pe sukusuka kino na Nkembo, akokufa te, akokufa soko moke te, liboso na Nzambe. Miso pe biyokeli, ekambaki, ná lokumu, ekambaki Falo na liwa na ye, pe na kobebisama ya Ezipito, ekólo na ye, pe etelema lisusu te banda wana.

¹⁷⁴ Yango wana. Soki otali *oyo*, okufi. Soki otali Oyo kuna, obiki. Sikawa poná. Kaka yango nde eloko oyo Nzambe atiaki liboso na Adamu ná Eva, na Elanga na Edeni. Bomoni? Na nzela na kondima, osengeli kopona.

¹⁷⁵ Sikawa botala, miso ekambaki Falo na liwa na ye, pe na kobebisama ya gumba na ye.

¹⁷⁶ Mose, ná kondima na ye, abangaki Falo ata moke te. Bomoni? Azalaki kotala oyo Falo azalaki koloba te. Azalaki kotala Falo te, pelamoko mama na ye pe tata na ye bazaláká kotala ndenge bazaláká kokanela bango te. Ntango Mose atitolamaki epai na ye, ete ye nde azalaki moto oyo asengelaki kosikola Ezipito. . . to kokamba Yisalaele libanda na Ezipito, azalaki kotala soko moke te oyo Falo azalaki koloba. Azalaki kobanga ye te. Amen, amen, amen! Bozali kososola oyo nazali koloba? [Losambo balobi: “Amen.”—N.D.E.]

¹⁷⁷ Kobanga ezalaka kati na kondima te. Kondima eyebi yango. Kondima, ndenge nalobaka yango ntango nyonso, ezali na misisa minene, ná suki na ntólo. Kondima elobaki: “Bokanga minoko!” pe moto nyonso akangi monoko. Esili. “Nayebi esika natelemi!”

Bamosusu balobi: “Ee, boye, mbala mosusu ezali bongo.” Bomoni?

¹⁷⁸ Kasi osengeli kotelema pe kolakisa misisa na yo. Esili. Kondima esalaka bongo.

¹⁷⁹ Botala, Mose abangaki Falo ata moke te nsima na Nzambe kotatola kobiangama na ye. Ntango Mose andimaki ete

abengamaki mpo na yango, kasi ntango Nzambe ayebisaki ye kuna: “Ezali bongo,” ayaki pe atalisaki liboso na Falo, pe bamosusu nyonso, ete atindamaki mpo na mosala yango, Mose abangaki Falo ata moke te.

¹⁸⁰ Botala, nzoka nde, Falo asalelaki bwanya na ye likolo na Mose. Botala. Alobaki: “Yoka nayebisa yo, na—nakosala boyokani ná yo.” Nsima na bitúmbu kolia nzoto na ye, alobaki: “Nakosala boyokani ná yo. Ókende kaka kosambela mwa moke, mikolo misato. Ósuka bobele wana, pe ókende mosika koleka wana te.” Kasi, boyebi. . . Biyokeli ya Falo nde eyebisaki ye bongo, bomoni: “Ósuka bobele wana, pe ókende mosika koleka wana te.”

¹⁸¹ Tozali na bato ya ndenge wana lelo oyo te? “Soki kaka okoti na lingomba, ekoki na yango.”

¹⁸² Kasi, boyebi, kondima oyo Mose azalaki na yango ezalaki kondimela losambo ya “kosuka wana” te. Alobaki: “Biso nyonso tozali kokende. Tozali kokende kino na suka. Ya solo. Tozali kokende na mboka na elaka. Tokokende bobele awa te mpo na kosala ebongiseli, pe kosuka. Tokokoba mobembo kino na suka.” Amen. “Nakokoba mobembo kino na mboka na elaka. Nzambe nde alakelaki biso yango.”

¹⁸³ Ba-Falo boni tozali na bango lelo oyo batelemi na biteyelo, bakonzi ya bibongiseli! “Sikawa, soki kaka osali *boye* na *boye*, esili na yango. Ee, omoni, bobele suka wana.”

Kasi Mose alobaki: “Oo, te! Te, te! Te, te!” Bomoni?

¹⁸⁴ Falo alobaki: “Ee, mpo na nini te? Soki olingi kozua losambo ya ndenge wana, ngai nakoyebisa yo oyo osengeli kosala, kaka yo ná bampaka bokende kosambela, Bomoni. Kaka yo ná bampaka bokende kosambela. Mpamba te, bino nyonso bokoki kozala na losambo ya ndenge wana, kasi bokotisa yango kati na libota te.”

¹⁸⁵ Boyebi oyo Mose alobaki? “Ata linzáka moko te ekotikala awa. Tokokende kino na suka. Biso nyonso tozali kokende! Ngai nakokende te soki bango bakei te. Pe, na ntango nyonso oyo ngai nazali awa, okolemba ngai.” Amen. “Ngai nakokende te bobele ete bango pe bakoka kokende, pe esili.” Oo, oyo nde mosali ya mpiko! Amen. “Nalingi komema bango elongo na ngai. Kaka mpo ngai nazui, bongo náfánda pe nálóba: ‘Ee, sikawa, *oyo* ezali malamu?’ Te, misié. Tolingi pe libota. Moto nyonso kati na biso azali kokende.” Amen. Alobaki: “Tokotika ata mpate moko awa te, ata eloko moko te. Ata linzáka moko ekotikala awa te. Biso nyonso tozali kokende na mboka na elaka.” Amen!

¹⁸⁶ “Moto nyonso kati na biso! Ózala mama ya ndako, to ózala mwa—mwana ya mosala, to mobange mwasi, to elenge mobali, to mobange mobali, to nani, tozali kokende, ata ndenge nini. Ata moto moko te kati na biso akotikala.” Amen. “Moto nyonso kati na biso azali kokende, pe eloko moko te ekopekisa biso.” Ya solo.

Ólalá! Balosambo wana ezalaki mpenza kowelana kuna, boye te? Ólalá!

¹⁸⁷ Te, Mose azalaki kondimela losambo oyo ya “kosuka wana” te. Te, azalaki kondimela yango te. Ha-aa. Iyo, misié. Ólalá!

¹⁸⁸ Tokoki kolobela yango mokolo mobimba, kasi nasengeli kokóma na motó na liteya na ngai nsima na mwa ntango mpo nábanda koteya.

¹⁸⁹ Botala, botala likambo oyo, ezali kitoko! Oo, nalingaka yango. Boyebi, sukasuka, Falo alobaki: “Bobima!” Nzambe autaki kopesa ye bitumbu, na mongongo ya Mose. Abetaki biloko nyonso. Asalaki nyonso oyo esengelaki kosalema. Atelemisaki. . . alalisaki moi, na nzanga. Asalaki nyonso mosusu. A—akotisaki molili na bantango ya moi. Amemaki magbololo, banzinzi, basili, pe biloko mosusu, móto, molinga, kufa na mabota na ye, pe biloko mosusu. Asalaki nyonso kino, sukasuka, Falo asengelaki koloba: “Bobima! Bokamata biloko na bino nyonso, pe bokende.” Ólalá! Nzambe asanzolama!

¹⁹⁰ Nazali mpenza na esengo ete moto akoki kosalela Nzambe na mobimba na lolenge ete ye, zabolo, ayebi te nini ásála na ye. Ya solo. Atosaki Nzambe na mobimba na lolenge ete zabolo alobaki: “Ólalá, bokende! Na—nalingi lisusu koyoka yango te.” Ya solo. Bokoki kosala yango, na mobimba mpenza.

¹⁹¹ Bomoni sikawa, soki—soki Nzambe ásungaka Mose te, mbele alingaki kokóma eloko ya koseka. Kasi Nzambe azalaki wana mpenza, azalaki kotatola. Nyonso oyo azalaki koloba, ezalaki kosalema.

¹⁹² Pe Falo asengelaki kotelema ngwi, mpo ete azalaki mokengeli, boyebi, na bongo a—asengelaki kotikala wana. Akokaki koboya te. Akokaki te koloba te, mpo ete esilaki kobanda kosalema. Bomoni? Akokaki te—akokaki te koboya yango, mpo ete esilaki kobanda kosalema. Na bongo sukasuka alobaki: “Oo, bobima kaka! Nalingi lisusu koyoka yo te. Bobima awa! Bokamata biloko na bino nyonso, pe bokende!” Ólalá!

¹⁹³ Sikawa tozali komona Mose, awa, nsima na Nzambe kosalela ye makambo ebele, pe kotalisa ye bilembo pe bikamwa mingi mpenza. Sikawa, kati na miníti zomi na mitano oyo ezali kolanda, tofandisa yango awa. Pe bolanda na bokebi. Mose akómákí na esika moko oyo a. . .

¹⁹⁴ Nzambe asíláká koloba na ye: “Nazali na yo. Maloba na yo ezali Liloba na Ngai. Nasili kotalisa yo yango polele, Mose. Yo, na ntango oyo banzinzi ezalaki te na mboka, ezalaki na eleko na yango te, yo olobaki: ‘Tika ete banzinzi eya,’ pe banzinzi eyaki.” Ezali kokela. Nani akoki komema molili na mokili mobimba, soki Nzambe te? Alobaki: “‘Tika ete molili ezala,’ pe molili ezalaki. Olobaki: ‘Tika ete magbololo ezala,’” pe magbololo ekotaki ata na ndako ya Falo, na bambeto, ntango batiaki bango

maboke minene-minene. Mokeli! “Pe Ngai nde nalobaki na nzela na yo, Mose, pe—pe Nasalaki ete Liloba na Ngai ékela na nzela na bibebu na yo. Nakómísí yo solo nzambe liboso na Falo.” Iyo, misié. “Nasali nyonso oyo.”

¹⁹⁵ Pe awa bakómí na esika moko, mwa komekama ekómeli bango, pe Mose abandi koganga: “Násála nini?”

¹⁹⁶ Nalingi ete bolanda malamumu. Oyo ezali liteya monene sikawa. Nalingaka yango, bomoni. Bomoni, Mose, soki totangi malamumu awa, ete Mo- . . . Ntango, Bana bakómákí kobanga, bamonaki Falo kolanda bango, kati na mosala na bango.

¹⁹⁷ Nzambe asilaki kosala nyonso malamumu be. Boye Atiaki bango kati na mobembo. Asangisaki lingomba. Babengami mpo na kobima. Babimi na bibongiseli ndenge na ndenge. Bango nyonso basangani. Mose azongaki kuna, pe alobaki: “Yawe, nasala nini?”

¹⁹⁸ Akokaki koloba: “Ee, kende kosala *boye*.” Malamumu, kende liboso. “Sikawa, Mose, oyebi ete Nabengaki yo mpo osala yango.”

“Iyo, Yawe.”

¹⁹⁹ “Malamumu, kende koloba *boye*, pe ekosalema,” banzinzi eyaki. “Loba *boye*,” pe esalemaki. “Sala *boye*,” esalemaki. Nyonso ezalaki YANGO ELOBI YAWE, YANGO ELOBI YAWE, YANGO ELOBI YAWE! Sikawa akómí na mikakatano . . .

²⁰⁰ Pe Nzambe alobaki: “Sikawa Nasili kotia bango kati na mobembo. Bango nyonso basili kobengama mpo na kobima. Lingomba esili kosangana, boye Natii bango kati na mobembo. Sikawa, Mose, komisa bango kuna. Nayebisaki yo bongo. Ngai nakofanda mpo napema mwa moke.”

²⁰¹ Mose alobaki: “E Yawe, tala azali koya, Falo azali koya! Libota mobimba bazali . . . Nasala nini? Nasala nini?” Bomoni oyo wana, yango ezali mpenza lolenge ya bato te? Iyo, misié. Abandaki koganga: “Nasala nini?”

²⁰² Awa tomoni Mose, na mobimba mpenza kotalisa lolenge ya moto, moto alingaka ete Nzambe álandaka ye ntango nyonso mpo na kopusa ye kati na likambo moko boye. Sikawa, yango nde oyo biso tozali lelo. Alingaka ete Nzambe, nsima na biso komona nyonso oyo tomóná, ata bongo alingaka ete Nzambe ápusa ye mpo ásála eloko moko boye. Bomoni?

²⁰³ Mose autaki kolemba, alobaki: “Nzambe, nakoya kotuna Yo, mpo nayeba oyo Okoloba. Iyo, iyo, Yo loba. Ee, malamumu, nakoloba pe yango.” Bomoni?

²⁰⁴ Kasi awa Nzambe asilaki kotia ye mpo na mosala wana, Atalisaki ete Azalaki elongo na ye. Pe ye oyo, mikakatano eyei, pe abandi koganga: “Nasala nini? Nkolo, nasala nini?”

205 Sikawa bomikanisela, asilaki kosakola awa, mpamba te alobaki: “Ba-Ezipito oyo bozali komona lelo, bokomona bango lisusu te.” Pe kaka nsima na yango abandi koganga: “E Nzambe, tosala nini?” Bomoni? Kaka nsima na ye kosala mosala kitoko ya kosakola kuna. Bomoni, asilaki koyebisa bango likambo oyo elingaki kosalema. Soki Liloba na Nzambe ezalaki kati na ye, Ezalaki kati na ye. Pe ntango azalaki kosakola yango, ezalaki mpenza kokokisama. Oyo azalaki koloba elingaki nde kokokisama, pe ye oyo awa akómákí koganga: “Nakosala nini?”

206 Oo, oyo wana nde lolenge ya bato! Oyo wana nde lolenge na ngai! Oyo wana nde lolenge na ngai! Bomoni?

207 Asilaki kotalisa polele: “Oyo yo okoloba ekokokisama. Nazali elongo na yo.”

208 Pe awa, kokoso ebimaki na ntango moko boye. “Nasala nini? Nasala nini, Yawe? He, Yawe, Ozali wapi? He, Ozali koyoka ngai? Nasala nini?” Nzoka nde Asilaki kotia ye, pe kotatola ye, kotalisa pe kosala nyonso na nzela na ye. Kasi awa: “E Nzambe?” Ólalá! Kotalisa mpenza na mobimba, ete moto alingaka ete ápéma pe átíka Nzambe ápusa ye.

209 Pe, nzoka nde, ayebaki ete Nzambe asilaki kopakola ye mpo na mosala yango, mpo ásála yango, pe ete Nzambe asilaki kotatola polele maloba na ye. Ntango ekokaki ete libota esikolama. Nzambe, na nzela na bilembo pe bikamwa na ye, Asangisaki bango nyonso elongo kati na liboke moko. Bozali kolanda ngai? [Losambo balobi: “Amen.”—N.D.E.] Asangisaki bango nyonso kati na liboke moko, Atatolaki maloba na ye. Makomi elobi bongo; elembo ezalaki awa, ndanga ezalaki awa, nyonso oyo alobaki. Na nsima ayei kati na bango lokola mosakoli. Nyonso, nyonso oyo azalaki koloba, Nzambe azalaki komemia yango, kino ata kokela pe kobimisa banzinzi, pe akelaki biloko. Pe nyonso oyo Alakeláká ye, awa Akokisaki yango.

210 Kasi azalaki kolinga kozela YANGO ELOBI YAWE. Bomoni? Asengelaki koyeba ete kotatolama mpenza ya kobiangama na ye ezalaki YANGO ELOBI YAWE. Mosala oyo atiamaki na yango ezalaki YANGO ELOBI YAWE. Bokoki kososola yango? [Losambo balobi: “Amen.”—N.D.E.] Hm! Mpo na nini azalaki kozela YANGO ELOBI YAWE?

211 Alingaki: “E Yawe, nasala nini? Tala awa, namemi bana oyo awa, kino awa. Kokoso yango oyo, Falo azali koya. Bango nyonso bakokufa. Nasala nini? Nasala nini?” Hm! Hm!

212 Asilaki kosakola oyo balingaki kosala. Asilaki koyebisa bango likambo mpenza, ete basala yango. Asíláká kosakola suka ya ekólo oyo akóláká kati na yango mpenza. Nabanzi ete bozali kososola. [Losambo balobi: “Amen.”—N.D.E.] Bomoni? Mose asíláká koloba: “Bokomona bango lisusu te. Nzambe akoboma

bango. Batiolá bino pe mingi. Nzambe akoboma bango.” Asiláká kosakola oyo elingaki kokómela bango.

213 Nsima na yango: “Yawe, nasala nini?” Bomoni lolenge ya moto kuna? Bomoni? “Nasala nini? Nakozela YANGO ELOBI YAWE.” Iyo, misié. “Nakotala oyo Yawe akoloba, bongo násála yango.” Ha!

214 Bomikanisela, falo oyo ayebaki Yosefe te akómákí mokonzi, boyebi, na eleko wana, kaka na eleko wana. Bomoni? Bomoni? Pe Mose atelemaki mbala moko mpo na kosakola suka ya ekólo yango.

215 Pe ye wana, na esika mpenza oyo makambo yango esengelaki kobanda kosalema, nsima abandi koganga: “Nasala nini, Yawe? Nasala nini?” Bomoni? Oyo wana ezali ndenge ya bato te? Oyo wana ezali mpenza lolenge ya moto te? “Nasala nini?” Ha!

216 Asilaki, kosakola. Nzambe asiláká komemia nyonso oyo alobáká, pe abengamaki mpo na mosala wana, na bongo mpo na nini asengelaki koloba: “Nasala nini?” Bosenga moko ezalaki; etalaki bobele ye ete aloba mpo na yango. Nzambe alingaki ete Mose asalela likabo wana ya kondima, oyo Asiláká kopesa ye. Nzambe asiláká kotatola yango. Ezalaki Solo. Pe Nzambe alingaki ete Mose, Alingaki ete libota bamona ete Azalaki na Mose.

217 Pe ye, kuna, azalaki kozela, alobaki: “Sikawa, Yawe, nazali bobele bebé. Tika ete Yo óyebisa ngai sikawa.”

“Iyo, nakokende kosala *boye*. Nazui YANGO ELOBI YAWE.”

“Ndeko, ezali nde YANGO ELOBI YAWE?”

218 “Iyo, iyo,” Ndeko Mose, “ezali YANGO ELOBI YAWE. Iyo.”

219 “Boye, tosili kozua yango sikawa, YANGO ELOBI YAWE.” Pe esalemaki. Ezangaki kosalema ata mbala moko te. Ezangaki kosalema soko moke te.

220 Pe yango oyo kati na mikakatano, ezongeli ye lisusu. Na ntango wana Asilaki kotia ye kati na mobembo. Lingomba esili kobengama mpo na kobima, Atiaki bango kati na mobembo, pe bazali kokende liboso. Pe Mose abandaki koganga: “E Yawe, ezali nde YANGO ELOBI YAWE? Nasala nini?” Malamu.

221 Nzambe alingaki ete Mose ázala na kondima, oyo Asiláká kotia na kati, na kati na likabo oyo Asiláká ko—kotatola polele. Nzambe asiláká kotatola polele epai na Mose pe na libota ete ezalaki nde Ye, na nzela na Liloba pe na nzela na makambo oyo elobámáká ete ekosalema. Etalisamaki polele. Azalaki lisusu na ntina ya komitungisa mpo na yango te. Bomoni? Asengelaki lisusu kokanisa ata nini na ntina na yango te, mpo ete esilaki kokóma polele. Asiláká kosala makambo yango. Pe Asiláká kotalisa polele, na nzela na banzini pe basili, ete alobaki pe biloko ekelamaki, ete Liloba na Nzambe ezalaki kati na ye.

222 Na bongo ye wana akei sikawa kotuna soki asala nini, na ntango oyo mikakatano ekómi mpenza liboso na ye. Bomoni? Ólalá!

223 Nabanzi ete likambo oyo ezali kokota mpenza na bozindo kati na biso, pe ete tozali komona epai tokómi. Bomoni? Yango esali te ete omiyoka monene *boye*? [Losambo balobi: “Amen.”—N.D.E.] Na ntango oyo tozali kokanisa Mose, kolobela mabunga na ye, pe kotala oyo ya biso. Iyo. Bomoni?

224 Azalaki wana, atelemaki wana, bomoni, ayebaki ete Makomi elobaki ete ngonga pe mokolo ekokaki mpo ete yango esalema, pe ayebaki ete Nzambe asilaki kokutana na ye kati na Likonzi na Mótó. Ekendeki kino liboso na libota pe Esalaki bikamwa oyo. Pe nyonso oyo azalaki koloba, ezalaki kosalema, kino ata kokela biloko. Kosala makambo oyo bobele Nzambe nde akokaki kosala, kotalisa ete mongongo na ye ezalaki Mongongo na Nzambe.

225 Pe kokoso eyelaki libota oyo azalaki komema, kokamba kino na mboka na elaka, nsima na yango ateleme, abandi koganga: “Nasala nini?” Oyo wana nde moto, alingi bobele ete . . .

226 Lokola Ndeko Roy Slaughter, nabanzi ete afandi libanda na nsima ya ekuke, mokolo moko alobaki na ngai, na ntina na moto moko oyo azalaki kosala ngai likambo moko boye. Nalobaki: “Ee, nasalaki *oyo*, pe sikawa oyo kuna.”

227 Alobaki: “Ndeko Branham, soki otiki bango báyécheme na lipeka na yo lelo, lobi okomema bango.” Yango mpenza nde lolenge ya bato. Lelo bayékémi na lipeka na yo, lobi omemi bango.

228 Ezali bongo, yango nde oyo Mose azalaki kosala. Nzambe asengelaki ntango nyonso komema ye nsima na Ye kotia ye pe kotalisa ye polele ete asengelaki kosala yango. Pe libota basengelaki koloba: “Mose, loba liloba. Namonaki yo kosala yango *kuna*. Nzambe amemiaki yo kuna, pe ozali kaka yo lelo.” Amen. Bomoni? “Sala yango!” Amen. Asengelaki koyeba yango, kasi ayebaki yango te. Malamu. Kaka ndenge ezalaki na eleko wana, ezali pe ndenge moko sikawa. Tomoni yango. Na bongo Alobaki: “Mo- . . .”

229 Nzambe asengelaki kolemba yango. Esengelaki kolembisa Nzambe. Alobaki: “Ozali koganga epai na Ngai mpo na nini? Nasili Komitalisa polele te? Nayebisaki yo te ete Natindi yo mpo na mosala wana? Nayebisaki yo te ete okende kosala yango? Nalakaki te ete Ngai nde nakosala yango; ete Nakozala na monoko na yo elongo, Nakoloba na nzela na yo, Nakosala yango, pe ete yo okotalisa bilembo pe bikamwa? Nalakaki te ete Nakosala yango? Nasali mpenza bongo te, pe Nabomi banguna nyonso nzinganzinga na yo te? Sikawa okómí awa, pembeni na Mbu Motane, kati na lotomo na yo mpenza, oyo Nayebisaki yo ete osala, nsima ozali kokoba kobeleva pe koganga epai na Ngai.

Ondimeli Ngai te? Ozali kososola te ete Natindi yo mpo osala yango?” Oo, oyo wana nde lolenge ya bato! Ólalá! Na bongo Asengelaki mpenza kolemba yango mingi.

²³⁰ Alobaki: “Oyebi ete osengeli na yango. Oyebi soki okomema bana oyo kino na mboka wana na elaka. Ezali mpenza bongo. Okangami awa na litúmu. Eloko mosusu okoki kosala ezali te. Na bongo bosenga ezali. Ozali koganga epai na Ngai mpo na nini? Ozali kotala Ngai mpo na nini? Ozali kobenga Ngai mpo na nini? Natalisi yango polele epai na libota te? Natalisi yo yango polele te? Nabengaki yango te? Ezali kati na Makomi te? Nalakaki te ete Nakomema libota oyo kino na mboka na elaka? Nabengaki yo te mpo na koyebisa yo ete Nakosala yango? Nabengaki yo te mpo na koyebisa yo ete Natindaki yo mpo na kosala yango, ete ezalaki yo te, ezalaki nde Ngai? Ete Nakokita pe Nakozala na bibebu na yo elongo, na lolenge ete nyonso oyo okoloba, Nakotatola yango pe Nakotalisa yango polele. Nasali yango te?”

²³¹ “Na bongo, ntango mwa likambo ekómeli yo, mpo na nini ozali kosala lokola bebé? Osengeli kozala mobali. Loba na libota,” amen, “nsima na yango bokende liboso!” Amen. Ezali bongo. “Koganga te. Loba!” Amen. Oo, nasepeli na yango. “Mpo na nini ozali koganga epai na Ngai? Loba kaka na libota pe bokende liboso kino na suka. Ata likambo nini, soki ezali bokono, to eloko nini, kosekwisa bakufi, to likambo nini, loba! Nasili kotalisa yango polele. Loba na libota.”

²³² Oyo nde liteya! Oyo nde liteya, ólalá, na esika oyo tokómí kati na mobembo. Botala esika tokómi sikawa, iyo, misié, na Pull ya Misato. Botala, tokómi mpenza awa na ekuke, ya Boyei na Nkolo.

²³³ Apakolamaki mpo na mosala yango, kasi azalaki ntango nyonso kozela YANGO ELOBI YAWÉ. Nzambe asengelaki mpenza kolemba yango. Alobaki: “Koganga lisusu te. Loba! Ngai moto natindaki yo.”

²³⁴ E Nzambe, Lingomba oyo esengelaki kozala ndenge nini na ntongo ya lelo! Ná kotatolama oyo ebongi be ya Nzambe, ná Likonzi na Móto, bilembo pe bikamwa, nyonso ekómí mpenza lokola na ntango na Sodoma. Alobaki ete ekozonga lisusu.

²³⁵ Tala mokili ekómí na lolenge wana. Tala ekólo ekómí na lolenge wana. Tala basi bakómí na lolenge wana. Tala mibali bakómí na lolenge wana. Tala lingomba ekómí na lolenge wana. Tala makambo nyonso. Binama, bilembo, basukúpe oyo epimbwaka pe nyonso na likolo, pe lolenge nyonso ya biloko oyo eyebani te, konguluma na mbu, bambonge minene, mitema ya bato kopasuka, na nsomo, ntango ya mikakatano, mitema likolo kati na bikólo, botomboki ya lingomba.

²³⁶ Pe moto na lisumu azali komonana, oyo azali komitombola likolo na biloko nyonso; oyo abengami Nzambe, oyo afandi kati na tempelo na Nzambe, azali komisakwela, ólalá, pe ayei na

ekólo oyo. Pe lingomba emibongisi, bango nyonso basangani elongo, lokola bana basi ya pité, epai na mwasi ya ndumba, pe nyonso ezali mpenza na molongo ya kindumba.

²³⁷ Kindumba, ezali nini? Koyebisa basi ete bakoki kokata suki na bango, koyebisa basi ete bakoki kolata bakupé, koyebisa mibali ete bakoki kosala *oyo* pe bakoki kosala *oyo kuna*; pe batei, bazali kosala *oyo*, koteya nsango ya kosepelisa bato pe makambo mosusu. Bozali komona te, ezali nde kosala ekobo na Liloba na Nzambe ya solo!

²³⁸ Pe Nzambe atindeli biso Liloba na Ye ya solo, oyo ezali ya mangomba ebongisami te, ata singa moko ya moke ekangami na Yango te, pe Apesi biso Likonzi na Móto, Molimo Mosantu oyo ekokisi mibu ntuku misato elongo na biso. Pe makambo nyonso oyo Asakolaki pe oyo Alobaki, esalemi mpenza ndenge Alobaki yango.

²³⁹ Loba na libota, pe tokende liboso. Amen. Tozali na esika moko epai tozali kokende, ezali nde na Nkembo. Tokende Kuna. Tozali kokende na Mboka na elaka. “Nyonso ekoki kosalema na moto oyo akondima.” “Loba na libota. Ngai natalisi yango polele te. Natiki te ete bakanga Ngai ata fotó kati na bino, pe nyonso mosusu, pe Nasali makambo nyonso oyo ekokaki kosalema, mpo na kotalisa polele ete Nazali elongo na bino? Bazolonale elobeli yango te, eleki mwa bapóso, ntango olobaki, awa na eteyelo, makambo oyo elingaki kosalema awa, sanza misato liboso na yango, pe ekómákí kosalema pe kotatolama? Ata zebi eyebi likambo yango. Ná makambo nyonso oyo Nasali, ozali naino kozela. Loba na libota pe bokende esika bozali kokende.” Amen.

²⁴⁰ Natana ayébísáká Dawidi te? Natana, mosakoli, mokolo moko afandaki, akutanaki na Dawidi, mokonzi oyo apakolamaki, alobaki: “Sala nyonso oyo ezali kati na motema na yo, mpamba te Nzambe azali na yo elongo.” Ayebisaki Dawidi: “Sala nyonso oyo ezali kati na motema na yo. Nzambe azali na yo elongo.”

²⁴¹ Yosua apakolamaki mpo na kokamata mboka mpo na Nzambe pe mpo na libota na ye. Mokolo ezalaki mokuse. Asengelaki na ntango mingi koleka mpo na mosala oyo apakolamaki mpo na yango pe oyo azuaki etinda ete asala. Yosua, azalaki moto, apakolamaki. Nzambe alobaki na ye: “Lokola ezalaki Ngai na Mose Nakozala bongo pe na yo.” Amen. “Mboka yango, Nakopesa bango yango. Boye Nalingi ete ókende kuna pe ósílisa ba-Ameleki, pe—pe ba-Hit-... Bamosusu nyonso—nyonso, ba-Filisitia pe—pe ba-Pelizi, pe bango nyonso, silisa bango nyonso. Nazali na yo elongo. Nako... Ata moto moko te akotelema liboso na yo, mikolo nyonso na bomoi na yo. Ata moto moko te akokoka kotungisa yo. Koba kokende kino ókóta kuna.”

Pe Yosua abimisaki mompanga na ye pe alobaki: “Bolanda ngai!”

²⁴² Akómákí kuna, pe abandaki kobunda. Ezalaki nini? Apanzaki banguna. Bakómákí mwa bitonga *awa* pe mwa bitonga *kuna*. Ntango butu elingaki koyinda, balingaki kosangana bango nyonso pe kosangisa mampinga mpo bayela ye na makasi mingi koleka. Pe moi ebandaki kolala. Asengelaki naino na pole. Moi ebandaki kolala. Afukamaki te mpo na koloba: “Yawe Nzambe, násála nini? Násála nini?” Alobaki! Azalaki na bosenga. Alobaki: “Moi, telema wana!” Agangaki epai na eloko moko te. Apesaki motindo: “Moi, telema wana! Nazali na bosenga na yango. Nazali mosaleli na Yawe, napakolami mpo na mosala oyo, pe nazali na bosenga. Telema wana, pe kongenga te. . . Pe, sanza, tikala esika ozuami,” kino ntango asilisaki kobunda etumba pe kokómbe biloko nyonso. Pe moi etosaki ye.

²⁴³ Agangaki te. Alobelaki nde moi, alobaki: “Telema wana. Moi, tikala wana! Pe, yo sanza, tikala esika ozuami.” Agangaki te: “Yawe, sikawa násála nini? Bakisela ngai mwa ndambo ya moi.” Azalaki na bosenga ya moi, na bongo apesaki yango motindo, pe moi etosaki ye. Ólalá! Apesaki moi motindo ete etelema.

²⁴⁴ Samasona, apakolamaki, abokolamaki, abulisamaki na Nzambe, apesamelaki likabo ya makasi, atiamaki mpo na koboma ekólo ya ba-Filistia. Atiamaki, abotamaki na mokili, apakolamaki na Nzambe, mpo na koboma ba-Filistia. Mokolo moko bakangaki ye na elanga, azalaki na mompanga te, azalaki pe na likonga te. Pe ba-Filistia nkóto bawelaki ye ná bibundeli na bango na mbala moko. Boye afukamaki pe alobaki: “E Yawe, nazali kozela emononeli? E Yawe, nasala nini? Kamba ngai sikawa na oyo nasengeli kosala?” Ayebaki ete azalaki na bosenga. Amonaki eloko mosusu te bobele mwa mbanga ya mpunda, pe abomaki ba-Filistia nkóto. Amen!

²⁴⁵ Agangaki epai na Nzambe ata moke te. Asalelaki likabo na ye oyo epakolamaki. Ayebaki ete atindamaki mpo na mosala yango. Ayebaki ete abotamaki mpo na yango. Ayebaki ete apakolamaki na likabo moko, pe abomaki ba-Filistia nkóto. Agangaki epai na Nzambe te. Nzambe asilaki kotia ye pe Atatolaki oyo ye azalaki, na nzela na makambo mosusu oyo asilaki kosala. Azalaki mosaleli na Nzambe, oyo atatolamaki pe apakolamaki, mpo na koboma ba-Filistia, pe asalaki yango. Ata soki mikakatano ezalaki ndenge nini, asalaki yango. Atunaki ata eloko moko te. Wana ezalaki mosala na ye. Ete, Nzambe azalaki kosala na nzela na ye; alokotaki mokuwa yango ya mpunda pe abandaki kobeta ba-Filistia. Ndenge. . .

²⁴⁶ Boye, soki abeti yango bobele mbala moko, likolo na ekoti ya motáko na bonene ya pouce moko na ndambo [3 cm—N.D.T.] ekokaki kopanza mokuwa yango na biteni milió. Kasi

alalisaki bato nkóto, abomaki bango, pe atikalaki na yango na loboko na ye.

²⁴⁷ Atunaki ata motuna moko te. Agangaki te. Alobaki. Apanzaki bango. Ólálá! “Nákamata ba-Filistia, nakoki kokamata ba-Filistia, Yawe? Na—nayebi ete Otindi ngai mpo násála yango, Yawe. Iyo, Yawe, nayebi ete Otindi ngai mpo náboma ekólo oyo ya ba-Filistia. Sikawa, nkóto mobimba bazingi ngai awa, pe nazali na eloko moko te. Nini, násála nini sikawa, Yawe?” Ólálá! Eloko moko elingaki kotungisa ye te. Apakolami mpo na mosala yango. Eloko moko ekoki kosala yo mabe te. Te, ata eloko moko te. Aleluya! Akamataki bobele eloko oyo azalaki na yango pe abetaki bango. Ya solo.

²⁴⁸ Ntango banguna bazingaki ye, balobaki: “Sikawa tozui ye kati na bitutu, tozui ye sikawa. Tozui ye awa na kati elongo na mwasi oyo. Sikawa tokangi ekuke, pe bisika nyonso, akoki kobima te. Tozui ye.”

²⁴⁹ Samasona agangaki te: “E Yawe, bazui ngai nazingami kati na ebongiseli.” Ha! “Aa, nakosala nini? Nasangani na bango. Nakosala nini?” Asalaki bongo te.

²⁵⁰ Abimaki kaka, apikolaki bikuke, atiaki yango na lipeka na ye, pe akendeki na yango. Amen! Apakolamaki mpo na mosala yango. Abengamaki na Nzambe. Bazingaki ye kuna na kati te. Te, soko moke te! Amemaki bikuke yango. Abondelaki mpo na yango te. Atunaki Nzambe te soki asengelaki kosala bongo to te. Ezalaki mpenza kati na lotomo na ye. Amen, amen, amen. Kati na lotomo na ye mpenza. “Mpo na nini ozali koganga epai na Ngai? Loba, pe kende liboso!” Amen! “Koganga te. Loba nde!” Atiki sikawa kokimela pe kolelalela. Asengelaki kokola na ndenge ekoki mpo na koloba. Ya solo. Ayebaki ete likabo na ye ya makasi oyo epakolamaki ekokaki koboma mo-Filistia nyonso oyo azalaki liboso na ye. Amen.

²⁵¹ Kasi biso toyebaka yango te, bomoni. Tozalaka ntango nyonso babebé, ná biberó na monoko.

²⁵² Ye ayebaki yango, ayebaki ete Nzambe atelemisaki ye na ntina wana, pe ete eloko ata moko te elingaki kotelema liboso na ye, mikolo nyonso na bomoi na ye. Eloko moko te ekokaki koboma ye. Atelemisamaki na ntina wana, lokola Mose. Eloko moko elingaki kopekisa ye te. Mo-Ameleki moko te to eloko mosusu te ekoki kopekisa ye. Azali kokende na mboka na elaka. Samasona ayebaki ete azalaki na nzela.

²⁵³ Yosua ayebaki ete alingaki kokamata mboka yango. Atatolamaki. Liloba na Nzambe elakaki yango, Molimo Mosantu azalaki wana kotatola yango.

²⁵⁴ Azalaki na nzela, boye eloko ata moko te elingaki kotelema na nzela na ye. Te, misié. Kati na lotomo mpenza, ná Nzambe, eloko ata moko te elingaki kotelema na nzela na ye. Na bongo apikolaki bobele bikuke pe atiaki yango na lipeka na ye, ezalaki

na bozito penepene tone minei to mitano, amataki likolo na ngomba pe afandelaki yango. Eloko moko elingaki kotelema na nzela na ye te. Azalaki na likabo oyo epakolami ya Nzambe. Azalaki na ntina te ya koganga: “E Yawe, nasala nini sikawa?” Asilaki kopakolama mpo na kosala yango. Ezalaki YANGO ELOBI YAWE: “Longola bango!” Aleluya! “Longola bango! Natelemisi yo na ntina yango.” Amen.

²⁵⁵ “Nasala nini, Yawe? Aa, nakosala nini awa pembeni na Mbu Motane?”

²⁵⁶ “Nayebisaki yo te ete Napesaki yo ngomba moko awa lokola elembo? Okoya lisusu na ngomba yango, pe okomema bana oyo kino na mboka. Nabengi yo na ntina wana te? Ozali komitungisa mpo na nini na ntina na eloko moko boye ete ekoki kotelema na nzela na yo? Loba, pe bobanda kokende liboso!” Amen pe amen! “Iyo, Nabengaki yo na ntina wana.”

²⁵⁷ Dawidi, ayebaki ete apakolamaki, pe ete atatomaki mpo na kozala mobeti malamau na matimbó. Ayebaki ete bato bayebaki ete azalaki mobeti malamau na matimbó. Dawidi apakolamaki. Ayebaki yango. Pe ntango atelemaki liboso na Goliata, agangaki te: “E Nzambe, nasengeli sikawa kosala nini? Zela, na—nasengeli. . . Nayebi oyo Osalaki na bambala eleki. Yo, Otikaki ngai náboma ngombolo, pe Otikaki ngai náboma nkosi. Kasi Olobi nini mpo na Goliata oyo atelema wana?” Ha! Asalaki bongongo te. Alobaki kaka. Alobaki nini? “Okozala lokola bango, okomona.” Alobaki pe akendeke liboso.

²⁵⁸ Abondelaki te. Apesaki mbeka ata moko te. Ayebaki ete apakolamaki. Amen. Apakolamaki, pe bilingongo wana etalisaki ete ezalaki eloko oyo esengelaki. Azalaki na kondima na kopakolama na ye. Azalaki na kondima ete Nzambe azalaki na makoki ya kokamba libanga wana semba kino na katikáti ya ekoti wana ya ebende, na esika bobele moko oyo ekokaki kobeta. Atelemaki wana.

²⁵⁹ Ayebaki ete azalaki mobeti malamau na matimbó. Amen. Ayebaki ete Nzambe nde asalaki ye bongongo. Amen. Ayebaki ete abomáká nkosi, ayebaki ete abomáká ngombolo, kasi oyo wana ezalaki mpo na biloko ya tata na ye ya mokili. Awa, ezalaki mpo na biloko ya Tata na ye ya Likolo! Amen! Afukamaki te mpo na koloba: “Nasengeli. . . Nasengeli sikawa kosala nini, Yawe?” Abimisaki maloba pe alobaki: “Okozala lokola nkosi pe ngombolo, pe ngai wana nazali koya.” Amen! Nkembo na Nzambe! Iyo, misié. Alobaki pe akendeke liboso mpo na kokutana na Goliata yango. Ólálá!

²⁶⁰ Atalaki mokuse na ye te! Azalaki elenge moko ya mwa motane, boyebi. Azalaki mpenza molai te. Azalaki mpenza kitoko te soki otali ye, elenge moko boye ya nzoto mike. Biblia elobi ete azalaki motane. Boye, atalaki mokuse na ye te pe oyo balobaka makoki na ye ya kosala makambo.

261 Boyebi, mo—mokengeli ayebisaki ye, alobaki: “Sikawa tala naino, mwana, mobali wana azali moto na likindo. Omoni, azali mobundi. Abotama mobundi pe azali . . . Azalaka mobundi, uta bolenge na ye; pe okokani na ye te.” Pe bandeko na ye ya mibali balobaki: “Oo, ozali na ntina te, yo. Oyei awa mpo na kosala likambo ya boye, zonga na ndako.”

262 Yango etungisaki ye te. Mpo na nini? Ayebaki ete apakolamaki. “Nzambe oyo abikisaki ngai na nkosi, Nzambe oyo abikisaki ngai na manzaka ya ngombolo, Akosala koleka oyo wana, Akobikisa ngai na maboko ya mo-Filistia wana. Ngai wana nazali koya. Nazali koya liboso na yo na Nkombo na Yawe Nzambe na Yisaleale.” Amen. Abondelaki ntango molai te; basilaki kobondela ntango molai mpo na ye. Nzambe nde abondelaki ntango molai mpo na ye liboso na kozalisama na mokili. Apakolamaki mpo na mosala yango. Asengelaki koloba pe kokende liboso. Yango nde nyonso oyo asengelaki kosala, bobele koloba pe kokende liboso. Oo, yango nde nyonso oyo asengelaki kosala. Oo! Te, ye . . .

263 Mpo na bandeko na ye ya mibali oyo ya bibongiseli, batioli pe bazalaki wana, boyebi. Oo, iyo. Bazalaki wana, bazalaki koloba, koseka, kotiola, pe koloba . . . Bandeko na ye ya mibali, boyebi, pe bazalaki koloba: “Aa, aa, aa, okokoka te. Yo, ozali mpenza na ntina te, yo.” Yango etungisaki ye ata moke te. “Olingaka kokesana na baninga. Olingaka kaka komilakisa.” Soki oyo wana ezalaki komilakisa, elingaki kozala bongo. Kasi bango bazalaki bobele kotala na ngambo ya maye ya bongó.

264 Dawidi ayebaki ete epakweli na mafuta ezalaki likolo na ye. Amen. Ezalaki kobongola eloko te mpo na ye. Alobaki: “Mo-Filistia wana akozala lokola ngombolo pe nkosi, boye ngai wana nazali koya.” Asakóláká yango liboso ete esalema. Asáláká nini? Abomáká ngombolo. Abomáká nkosi. Abomáká nkosi na . . . Na nini? Na—na bilingongo, pe akamataki mbeli, nsima na yango abomaki ngombolo. Nkosi, abomáká nkosi na mbeli. Asalaki ndenge moko na Goliata. Abomaki ye na libanga, pe abimisaki mompanga na ye, pe akataki ye motó, kaka wana libanda. Asakóláká nini liboso ete esalema? “Pe okozala lokola bango.” Mpo na nini? Alobaki liloba ete ekosalema bongo, nsima na yango akendeki liboso mpo na kokokisa yango. Amen. Oo, ndeko! Alobaki, azuaki likambo yango na maboko mokolo wana.

265 Soki eleko moko ezali oyo moto asengeli koloba, ezali nde sikawa. Nalingi nasilisa, na mwa miniti oyo ezali koya, soki bokoki koyika mpiko lisusu na mwa miniti moke. Nazali naino na mwa makambo mosusu oyo nakomákí awa, mwa Makomi oyo nalingi kokóma na yango.

266 Petelo agangaki te, ntango akutanaki na moto oyo azalaki na kondima oyo ekoki mpo na kobikisama, alali na ekuke oyo

bazalaki kobenga Kitoko. Afukamaki te mpo na kobondela butu mobimba, pe, to mpo na kobondela moi mobimba, libondeli ya kafukafu pe ya molai, alobaki te: “Nkolo, nabondeli Yo sikawa ete Osunga mwa ebosono oyo. Namoni ete azali na kondima. Nayebi ete azali mondimi. Natuni ye, pe ye—ye . . . Ngai—ngai—ngai . . . Alobi ete azali na kondima, ete akondima oyo nalobi na ye. Pe nalobi na ye na ntina na . . . na ntina na oyo Osalaki, pe na—nakanisi mpenza sikawa, Nkolo, ete—ete . . . Okoki kopesa ngai YANGO ELOBI NKOLO mpo na ye?”

²⁶⁷ Te, ayebaki ete apakolamaki lokola ntoma. Ayebaki ete Yesu Klisto apesaki ye etinda. “Bobikisa babeli, bosekwise bakufi, bopetola bato na maba, bobimisa milimo mabe. Bozui ofele, bopesa pe ofele.” Alobaki: “Petelo, kende kosala yango!” Asengelaki kobondela ntango molai te. Asilaki kozua etinda.

²⁶⁸ Alobaki nini? Alobaki: “Na Nkombo na Yesu Klisto!” Alobaki Nkombo na Yesu Klisto, pe mobali yango alalaki kaka wana. Akamataki ye na loboko, pe alobaki: “Telema!” Asimbaki ye wana kino ntango mikuwa na ye ya makáká ezuaki makasi, pe abandaki kotambola. Mpo na nini? Asalaki liyangani ya mabondeli butu mobimba te. Agangaki epai na Nzambe te. Ayebaki na lolenge malamumu, uta na bibebu ya Yesu Klisto, ete apakolamaki mpo na mosala wana. Iyo. Alobaki pe atelemisaki ye, mpamba te ayebaki ete apakolamaki lokola ntoma na ntina wana.

²⁶⁹ Bato oyo balalaki na elili na ye balobaki te: “Oo, yaka, ntoma Petelo, ganga likolo na biso, pe bondela libondeli ya kondima mpo na biso, epai na Nzambe.” Te, te, balobaki bongo te. Bayebaki ete azalaki ntoma oyo apakolamaki pe atatolamaki na Nzambe. Boye balobaki: “Botika biso bobele tólala na elili na ye. Ozali na ntina na koloba liloba moko te. Toyebi yango. Tondimi yango.” Bomo kati na bango! Ntoma akokaki kokóma epai na bango nyonso te. Pe bango, bango moko, bazali eteni na yango.

²⁷⁰ Mose alobaki: “Nakokende kaka ngai moko te. Bisu nyonso tozali kokende.” Bisu nyonso tozali na eloko ya kosala. Bisu nyonso tosengeli kopakolama.

²⁷¹ Pe bamonaki ntoma wana atelembi wana, bamonaki ye kobikisa mobeli wana pe kosala makambo oyo asalaki. Bayebaki ete akokaki kokóma epai na bango te. Balobaki, balobaki te: “Petelo, yaka ko—kobondela libondeli, pe zela sikawa kino ntango okozua YANGO ELOBI NKOLO, bongo oya koyebisa ngai. Tómona oyo Nkolo akoloba.” Balobaki: “Soki tokoki bobele kolala na elili na ye, mpamba te Nzambe mpenza oyo azalaki kati na Yesu Klisto azali kati na ye, pe tozali komona kaka misala yango kosalema. Boye basimbaki songe ya elamba ya Yesu pe balalaki na elili na Ye, pe Yesu azali kati na mobali oyo. Soki elili wana eleki likolo na biso, tokobika.”

272 Pe Biblia elobi ete bango nyonso babikaki. Basalaki liyangani ya mabondeli butu mobimba te, na koloba: “Nkolo, soki nakei kolala na elili ya ntoma wana?” Te, bayebaki yango. Pole esilaki kobeta bango. Mitema na bango etondaki. Kondima na bango ezalaki na bonsomi. Amen. Bandimaki yango. Basilaki komona yango. Ezalaki pe ndenge moko mpo na misuale ya Polo.

Sikawa, mpo na kosilisa.

273 Yesu agangaki te ntango bamemelaki Ye elenge elema wana, oyo azalaki na maládi ya ndeke, oyo azalaki kokweya na móto. Alobaki te: “Tata, Nazali Mwana na Yo, pe sikawa Otindaki Ngai awa mpo na kosala *boye na boye*. Nakoki kobikisa elenge mobali oyo?” Alobaki bongo te. Alobaki: “Bima kati na ye, Satana!” Alobaki, pe elenge mobali abikisamaki.

274 Ntango Akutanaki na Limpinga, oyo azalaki na milimo mabe nkóto mibale kati na ye, Yesu agangaki te. Milimo mabe nde bagangaki: “Soki Okobengana biso,” ólalá, “tinda biso epai na etonga na ngulu.”

275 Yesu alobaki te: “Sikawa, Tata, Nakoki kosala yango?” Alobaki: “Bobima kati na ye,” pe milimo mabe bakimaki. Na ntembe te, Ayebaki ete Azalaki Masiya.

276 Na nkunda ya Lasalo, asiláká kokufa eleki mikolo minei. Balobaki: “Soko Ozalaki awa, Nkolo, alingaki kokufa te.”

277 Alobaki: “Nazali lisekwa pe Bomoi.” Amen! Ezali te wapi, ntango nini, to ndenge nini. “Ye oyo azali kondima Ngai, ata asili kokufa, akobika.” Amen. Ayebaki Oyo Azalaki. Ayebaki nani Azalaki. Ayebaki ete Azalaki Emanuele. Ayebaki ete Azalaki lisekwa. Ayebaki ete Azalaki Bomoi. Ayebaki ete litondi mobimba na Bonzambe efandaki kati na Ye na motindo na nzoto. Amonaki mwa bato wana, pe na bongo Amonaki oyo Nzambe ayébísáká Ye ete ásála, pe Akómákí wana. Akendeiki wana.

278 Alobaki te: “Sikawa, zela, Nakofukama awa. Bino nyonso bofukama pe bobondela.” Alobaki: “Bondimi ete Nazali na makoki ya kosala yango?” Amen. Atunaki bongo.

279 Ezalaki Ye te; ezalaki nde bango. “Iyo, Nkolo, nandimi ete Ozali Mwana na Nzambe oyo asengelaki koya na mokili.” Ólalá! Ye wana Amitalisi. Eloko moko esengeli kosalema.

280 “Lasalo, bima libanda!” Alobaki, pe mokufi abimaki libanda. Ezali te, “Nakoki?” Alobaki kaka. Ntango kondima emonanaki, likambo esalemaki.

281 Ye Alobi, Alobaki, pe bakufi miso bamonaki, bakakatali batambolaki, bakufi matoi bayokaki, milimo mabe bagangaki pe babimaki, bakufi basekwaki, nyonso. Mpo na nini? Abondelaki ntango molai te. Apakolamaki lokola Masiya. Ye nde Azalaki Masiya yango. Ayebaki ete ezalaki Ye. Ayebaki esika na Ye. Ayebaki mosala oyo Atindamaki kosala. Ayebaki ete Tata atalisaki Ye mpo ázala Masiya, mpo na mondimi. Pe ntango

Akutanaki na mondimi wana oyo azalaki na kondima, Alobaki bobele Liloba. Milimo mabe bapalanganaki. Iyo, Misié. “Loba! Koganga te. Loba!” Amen.

²⁸² Pe Ayebaki makoki oyo Nzambe apesaki Ye, kasi biso toyebi te. Ayebaki nani Ye azalaki. Bisu toyebi te.

²⁸³ Mose abosanaki. Samasona asosolaki. Bamosusu basosolaki. Yosua asosolaki. Mose abosanaki. Nzambe asengelaki kobenda makanisi na ye epai wana. Alobaki: “Mpo na nini ozali koganga epai na Ngai? Natindaki yo mpo ósála mosala yango. Loba, pe bokende kino na suka. Nayebisaki yo ete bokoya na ngomba oyo. Kamata bana wana pe koba kokamba bango. Loba kaka. Oyo okokutana na yango na nzela etali Ngai te, sukuma yango libanda na nzela. Napesi yo bokonzi ya kosala yango. Nalobaki. . . Olobaki pe banzini ná basili ekelamaki, ná biloko ya ndenge wana. Sikawa okómí kobeleda epai na Ngai mpo na nini? Mpo na nini ozali koya epai na Ngai, wana ezali yo kobeleda makambo oyo? Loba kaka pe okomona yango kotambola, esili.” Olalá! Oo, nalingi yango mingi!

²⁸⁴ Tala, Yesu, nyonso oyo Azalaki koloba, Azalaki bobele koloba Liloba, pe ezalaki kosalema bongo. Nzambe asilaki kotatola Ye na bolamu ete Azalaki Mwana na Ye. “Oyo Mwana na Ngai na bolingo, Nasepeli na Ye mingi. Boyoka Ye.”

²⁸⁵ Botala Ye. Nasepeli na yango. Azalaki kotelema na mpiko pe na bokonzi mingi liboso na batóngi na Ye. Amen. Alobaki: “Boboma tempelo oyo, pe Nakobondela Tata mpo Natala oyo Akosala mpo na yango?” “Boboma tempelo oyo, pe Nakotemisa yango lisusu, na mikolo misato.” Ezali te: “Nazali kolikia; Nakomeka.” Kasi “Nakosala yango!” Mpo na nini? Makomi nde elobi bongo.

²⁸⁶ Kaka Likomi oyo elobi ete Akosekwisa nzoto na Ye, epesi biso bokonzi, Nguya. Amen! “Na Nkombo na Ngai bakobengana milimo mabe, bakoloba minoko na sika; soko bakolokota banyoka, to soko bakomela biloko na kufa, ekoyokisa bango mpasi te; soko bakotia maboko na bato na maladi, bakobika.”

“Mpo na nini koganga epai na Ngai? Loba, pe kende liboso.” Oo, na mpiko na . . .

“Boboma tempelo oyo, Nakotemisa yango lisusu.” Oo!

²⁸⁷ Pe bomikanisela sikawa, (tolingi kosilisa), ezalaki kaka Ye wana. Ye nde Alobaki, na Yoane 14:12, ete mo. . . “Ye oyo akondimaka Ngai, misala mizali Ngai kosala, akosala yango pe lokola.” Ezali solo? [Losambo balobi: “Amen.”—N.D.E.] Ye nde Alobaki bongo.

²⁸⁸ Ezalaki Yesu, na Malako 11:24, nde alobaki: “Soko olobi na ngomba oyo,” ezali te soko obondeli mpo na ngomba oyo. “Soko olobi na ngomba oyo: ‘longwa,’ pe otii ntembe na motema na yo te, kasi ondimi ete yango elobi yo ekobima boye, ekosalema

mpo na yo.” Sikawa, yo soki olobi yango kaka na komeka-meka, ekosalema te. Kasi soki eloko moko kati na yo, ete o—opakolami mpo na mosala yango, oyebi ete ezali mokano na Nzambe ete ósála yango, pe olobi yango, esengeli kosalema. “Soko bo . . .”

²⁸⁹ Ye nde Alobaki likambo oyo. “Soko bokoumela kati na Ngai, pe Maloba na Ngai makoumela kati na bino, bolomba likambo nini lilingi bino pe ekosalamela bino.” Ólalá! Ólalá! Bomoni oyo nalingi koloba? [Losambo balobi: “Amen.”—N.D.E.]

²⁹⁰ Bolimbisa oyo, kasi ezali se koyela ngai. Esengeli ete naloba yango. Mokolo wana, kuna, na kati ya zamba, Ye nde alobaki: “Ozui nyama te.” Pe Akelaki biséndé misato kaka wana liboso na biso. Ezali nini? Bobele koloba liloba, koloba: “Bakozala *kuna*, *kuna*, pe *kuna*,” pe babimaki wana. Ye nde Asalaki yango.

²⁹¹ Charlie, Rodney, Ezalaki nde Ye kuna na Kentucky; pe Nellie, Margie, pe bino nyonso. Ezalaki nde Ye, kaka Nzambe oyo azalaki kuna pe oyo Alobaki na Mose, Alobaki: “Mpo na nini ozali koganga epai na Ngai? Loba liloba!” Ye nde akelaki bango. Ezali nde Ye. Ezali Ye. Ólalá!

²⁹² Ye nde Apesaki emononeli eleki penepene mobu moko, oyo elobaki ete tolingaki kokende kuna, pe Bilembo Nsambo oyo, ete nkake mo—mo—mo—moko ya monene nde elingaki kobandisa yango, pe ete elingaki kozala na lolenge ya piramide. Pe *Look zulu*— . . . zulunali *Life* nde elobaki yango, etiami na etutu na kati kuna. Ye nde Alobaki yango.

²⁹³ Ezalaki Ye, na mpokwa wana, ntango nazalaki kokende na nzela wana pe namonaki nyoka monene oyo mamba pene na kokanga ndeko na ngai. Alobaki: “Opesi . . . opesameli Bokonzi ya kokanga ye, to ata nyoka nini.” Ye nde Alobaki yango.

²⁹⁴ Epai na mwasi na ngai moke oyo akómí na suki ya pembe pe oyo afandi kuna na nsima: Ezalaki Ye na ntongo wana, nde Alamusaki ngai kuna na eteni ya kolala, Atelemaki na coin, pe Alobaki: “Kobangaka te kosala soko nini, to kokende soko wapi, to koloba soko nini, mpamba te Bozali na Yesu Klisto oyo ezangaka soko moke te ezali na yo bisika nyonso okokende.”

²⁹⁵ Ezalaki nde Ye kuna na Sabino Canyon, eleki penepene sanza misato, ntango nazalaki kobondela, nazalaki komituna likambo nini elingaki kosalema. Nazalaki wana, pe mompanga ekweyaki na loboko na ngai, pe Alobaki: “Oyo ezali Mompanga na Mokonzi.” Ezalaki nde Ye.

²⁹⁶ Ye nde alobaki na ngai: “Lokola Nazalaki na Mose elongo, boye Nakotinda yo.”

²⁹⁷ Ye nde Alobaki na ngai, eleki mibu ntuku misato, kuna na ebale, ntango nazalaki elenge. Natelemaki wana lokola elenge motei, na ebale, eleki mibu ntuku misato, natelemaki wana ntango Pole wana, kaka Likonzi na Mótó wana, ekitaki uta na likolo, etelemaki wana, pe Alobaki: “Lokola Natindaki Yoane

Mobatasi ete aya liboso na boyei ya yambo ya Klisto, Nsango na yo ekoya liboso na Boyei ya Mibale,” mpo na mokili mobimba. Ekokaki kosalema ndenge nini, na ntango oyo mokengeli na ngai mpenza asekaki pe atiolaki yango? Kasi esalemaki mpenza ndenge wana. Ye nde Alobaki yango. Iyo, misié!

²⁹⁸ Oo, ezalaki mpenza Ye nde alobaki kati na esakweli, na emononeli: “Ekokokisama.” Ye nde Alobaki: “Soko moko kati na bino asakoli, to amoni emononeli, pe alobi likambo, pe ekokisami; na bongo boyeba ete ezali ye te, ezali Ngai. Nazali na ye elongo.” Ólalá! Nakoki kokoba kobakisa, pe koloba ete ezali Ye, ezali Ye, ezali Ye!

²⁹⁹ Ye nde Akitaki, ntango nazalaki koyebisa bango ete Likonzi na Móto ezalaki kuna na ebale, pe bakokaki kondima yango te. Ezalaki nde Ye kuna na kati, ntango motei ya Batiste wana, liboso na bato nkóto ntuku misato na mpokwa wana, na kati ya Sam Houston Colosseum, ntango Mwanje na Nkolo akangamaki fotó, kaka wana. Ezalaki Ye, oyo Azali motindo moko lobi, lelo, pe libela.

³⁰⁰ Ye nde Asakolaki mpo na esika oyo makambo oyo elingaki kosalema. Ye nde Alobaki yango. Ye nde Asalaki makambo oyo. Azali motindo moko lobi, lelo, pe libela. Akokisi makambo nyonso mpenza ndenge Alobaki ete Akosala yango. Amen.

³⁰¹ Názela mpo na nini? Nzambe asili kotatola Liloba. Ezali Solo. Tokende. Totambola. Tolanda matambe na Nkolo, wana totii pembeni ntembe nyonso, masumu nyonso. Bosukola ndako, bonika yango malamau.

³⁰² Ndenge emononeli ya Junior Jackson elobaki, eloko mosusu etikali te bobele minda; to liloto na ye, soki azali awa. Bobele minda nde etikali, pe ezingamaki na mikoloto ya wolo, na liloto oyo ayebisaki ngai mokolo wana na mpokwa. Ólalá!

³⁰³ Ndeko Collins, komitungisa mpo na mbisi wana te. Ezalaki ya mpembe. Bobele ete oyebaki ndenge ya kosalela yango te.

³⁰⁴ Botia pembeni nyonso mosusu oyo ekeseni na Yango. Bomikanisela, oyo nde Solo, ata soki boni Ezali komonana lokola ya bilandálanda, pe nyonso wana. Bokoba kokende liboso ná Yango. Ezali Molimo Mosantu. Kaka Nzambe oyo asekwisaki Yesu Klisto uta na bakufi, kaka Ye oyo akoki kokela biloko na maloba, kaka Ye oyo azalaki na bomoi na eleko na Mose, Azali ndenge moko lelo.

³⁰⁵ Asili kotatola mbela na Ye na eleko oyo ya suka. “Pelamoko na mikolo na Sodoma, ekozala bongo na Boyei na Mwana na moto.” Asili. . . Sodoma ezali kuna. Billy Graham moko ná Oral Roberts moko bazali kuna. Pe Lingomba ezali kokende liboso, kaka na nzela na bilembo oyo Alakaki, na bisika nyonso mibale, pe bango wana. Ye nde Alobaki yango.

306 E Nkolo, pesa ngai mpiko, yango nde libondeli na ngai. Sunga ngai, E Nkolo Nzambe.

Esengeli ete násukisa awa. Ntango ekómí koleka.

307 “Mpo na nini koganga epai na Ngai? Mpo na nini ozali koganga epai na Ngai, na ntango oyo Nasili kotalisa polele ete Nazali na bino elongo? Nabikisi babeli na bino te,” Akokaki koloba bongo? “Nayebisaki bino te makambo oyo ekokisami mpenza ndenge elobamaki? Mokengeli na bino akoki kosala yango te. Ngai nde! Ye akoki te; azali moto. Ezali nde Ngai, Nkolo,” Akokaki koloba bongo. “Ngai nde Nasalaki yango. Ngai nde Nayebisaka ye makambo oyo asengeli koloba. Ezali ye te. Ezali Mongongo na Ngai. Ngai nde Nasekwisaka bakufi na bino ntango bakweyaka. Ngai nde Nabikisaka babeli. Ngai nde Nasakolaki makambo oyo. Ngai nde Napesaka lobiko. Ngai nde Napesaki elaka.”

308 E Nzambe, pesa ngai mpiko ya kokamata Mompanga ya Liloba oyo Atiaki na loboko na ngai eleki mibu penepene ntuku misato na misato, násimba yango pe nátámbola mpo na kokende kino na Pull ya Misato, yango nde libondeli na ngai.

Togumba mitó.

309 Tata na biso na Likolo, ngonga ekómí koleka, kasi Liloba ezali kokóma elengi. Ndenge tozali komona yango, Nkolo, mbala na mbala, ete Bozali ya Klisto oyo ezangaka te ezali ntango nyonso kokutana na biso. Natondi Yo mingi mpo na bolamu na Yo! Obateli biso pe Ozali . . . pe Opamboli biso, totondi Yo mingi mpo na yango!

310 Na ntango oyo nasimbi misuale oyo na maboko na ngai, Nkolo, bazali bato oyo bazali na kondima, oyo bandimi Yango. Tika ete milimo mabe nyonso, bokono nyonso etika bato yango. Pe napameli milimo nyonso oyo ezali awa; oyo ya mbindo, ya Nzambe te, milimo nyonso ya bokono, maladi nyonso pe mpasi nyonso. Tolali na elili ya moto te, atako ezali mabe te, kasi tozali na elili ya Nsango Malamu, Nsango Malamu oyo etatolami.

311 Na ntango oyo Likonzi na Móto ya nkembo ezali kotambola bipai na bipai kati na ndako oyo, kaka Yango moko oyo Nzambe atalaki kati na yango, pe Mbu Motane etelemaki, pe Yisalaele bakatisaki na ngambo. Kasi sikawa wana ezali Ye kotala, ezali komwangisa Makila ya Mwana na Ye Moko, na ntango na mawa pe na ngolu. Tika ete tozala na botosi. Tika ete lelo oyo totika koloba, koganga. Tika ete tososola ete Obengi biso mpo na mosala oyo. Ngonga ekoki. Nazali koloba yango na Nkombo na Yesu Klisto, tika ete bokono nyonso etika esika oyo.

312 Tika ete mobali pe mwasi moko na moko, oyo abelelaka Nkombo na Yesu Klisto, abulisa lisusu bomoi na ye lelo oyo. Nabalisi oyo ya ngai, Nkolo, likolo na etumbelo ya libondeli. Namipesi ngai moko, namiyoki nsoni pe natii elongi na nse epai Okamataki ngai. Nkolo Nzambe, nayoki nsoni mpo na bolembu

na ngai pe bozangi kondima na ngai. Limbisa yango, Nkolo. Pesa ngai mpiko. Pesa biso nyonso mpiko.

³¹³ Nazali komiyoka, lokola Mose, ete biso nyonso tozali na nzela mpo na kobima. Toboi kotika ata moto moko. Tolingi komema moto nyonso, Nkolo. Bazali ya Yo. Nalombi bango mpo na Yo. Pambola bato oyo lelo, Nkolo. Pesa biso yango. Pe pambola ngai, ná bango, Tata, pe Nkombo na Yo nde ekokumisama. Nkembo ekozonga epai na Yo. Pesa biso kondima oyo ya Seko, Nkolo, na ntango oyo tozali komibulisa epai na Yo sikawa.

³¹⁴ Wana nayekemi likolo na Biblia oyo pe likolo na eteyelo oyo, napesi Yo bomoi na ngai, Nkolo. Nazali kotalela elaka moko na moko oyo Opésá. Nayebi ete ekotatolama. Nayebi ete ezali Solo. Pesa ngai mpiko ya koloba Maloba oyo. Pesa ngai mpiko, Nkolo. Kamba ngai na oyo nasengeli kosala pe koloba. Namipesi epai na Yo, ná losambo oyo, elongo na yango, Nkolo, na Nkombo na Yesu Klisto. Amen.

Kondima na ngai . . . likolo epai na Yo,
Yo Mwana na Mpate ya Kalvari,
Nzambe Mobikisi;
Sikawa yoka ngai wana nazali kobondela,
Longola masumu na ngai nyonso,
E tika ete banda lelo
Nazala mobimba wa yo!

³¹⁵ Sikawa totelema, na kimia nyonso, wana ezali biso koyemba yango monoko ekangami. [Ndeko Branham ná losambo babandi koyemba monoko ekangami, *Kondima na ngai etali likolo epai na Yo*—N.D.E.]

. . . epai na Yo,
Yo Mwana na Mpate . . .

Totombola maboko epai na Ye sikawa.

E Mobikisi . . .

Bomibulisa epai na Nzambe sikawa.

Sikawa yoka ngai wana nazali kobondela,
Longola ntembe na ngai nyonso,
E tika ete banda lelo
Nazala mobimba wa yo!

³¹⁶ Sikawa elongo, wana totomboli maboko. [Losambo bazali kozongela libondeli oyo nsima na Ndeko Branham—N.D.E.] Nkolo Yesu, [Nkolo Yesu,] nazali sikawa [nazali sikawa] komibulisa epai na Yo, [komibulisa epai na Yo,] mpo na bomoi ya mosala, [mpo na bomoi ya mosala,] na bopeto koleka, [na bopeto koleka,] bakisela ngai kondima, nabondeli Yo, [bakisela ngai kondima, nabondeli Yo,] mpo ngai [mpo ngai] nákoka kozala mosaleli oyo andimami [nákoka kozala mosaleli oyo andimami] na bomoi na ngai oyo ezali koya, [na bomoi na ngai oyo ezali koya,] koleka ndenge nazalaki [koleka ndenge nazalaki] na

bomoi oyo eleki. [na bomoi oyo eleki.] Limbisa kozanga kondima na ngai, [Limbisa kozanga kondima na ngai,] pe zongisela biso [pe zongisela biso] Kondima [Kondima] oyo epesamaki mbala moko na basantu. [oyo epesamaki mbala moko na basantu.] Namipesi epai na Yo, [Namipesi epai na Yo,] na Nkombo na Yesu Klisto. [na Nkombo na Yesu Klisto.]

317 Sikawa wana togumbi mitó.

Na bomoi na ngai wana nazali kotambola na
 banzela ya molili,
 Pe mawa ezingi ngai,
 Zala Mokambi na ngai;
 Tinda ete molili ékóma pole,
 Longola nsomo na ngai nyonso,
 Kotika ngai soki moke te natangwa
 Mosika na Yo.

318 Wana togumbi mitó sikawa. Bomiyoki ete Liteya ya ntongo oyo esali bino malamú? [Losambo balobi: “Amen.”—N.D.E.] Epesi bino mpiko? [“Amen.”] Soki bolingi, botombola bobele maboko epai na Nzambe, boloba: “E Nzambe, natondi Yo.” [“E Nzambe, natondi Yo.”] Natomboli maboko na ngai nyonso mibale, mpo ete namiyoki mpenza bongo, ete e—esungi ngai. Epesi ngai mpiko.

319 Makambo mosusu nalobi, nakanisaki te ete nakoloba yango, kasi esili kolobama. Ezalaki mpamela mpo na ngai. Namimoni ete nazali ndenge nakanisaki te, kasi namimoni ete nakwei na likambo ya koganga ntango nyonso, na esika ya koloba.

320 E Nzambe, sunga ngai, banda na ngonga oyo, ete názala mosaleli oyo abulisami koleka.

321 Nazali kobondela bobele mpo na ngai moko te. Nazali kobondela pe mpo na bino, ete, elongo, lokola Nzoto na Klisto, oyo ebengami libanda na mokili, oyo ezali komilengela mpo na kokende na Mboka na elaka, ete Nzambe ápésa ngai mpiko ya koloba, ya kokómisa nzela polele na lolenge ete bobunga nzela te. Nakoyebisa bino, na ngolu na Nzambe, ete nakolanda matambe ya Makila na Ye Oyo alekaki liboso na biso.

Pe nakomema ekulusu oyo ya bulee,
 Kino ete liwa épésa ngai bonsomi,
 Nsima nde nakozonga na Ndako, mpo na
 kolata motóle,
 Motóle moko ezali kuna mpo na ngai.

322 Topesi yango epai na Yo, Tata, kobulisama na biso, na Nkombo na Yesu Klisto, Mwana na Yo. Amen.

323 [Ndeko mobali moko abandi koloba monoko ya sika. Maloba mazangi na eteni oyo ya bande—N.D.E.]

324 Totondi Nkolo mpo na yango. Botambolaka na bomoi oyo ebulisami. Bomipesa, mpo bozua boboto, komikitisa.

Botambolaka kati na Molimo. Botambolaka, bolobaka, bolataka, bosalaka lokola Baklisto, na komikitisa pe na boboto. Na bongo botika te ete ézánga. Mongongo na Nzambe elobaka na nzela na Liloba, elobaka na nzela na makabo. Ntango likabo moko eyei, mosusu etalisi yango, likabo mosusu eyei kotalisa bobele eloko wana. Bomoni, na ntembe te elongobani ná Liloba pe elongobani ná eleko. Nzambe azali na biso elongo. Totondi Ye mingi mpo na yango! Sikawa soki. . .

³²⁵ Wana togumbi mitó, soki ndeko na biso ya mwasi akoki kotinda nzembo oyo:

Mema Nkombo na Yesu,
Lokola nguba liboso na motambo nyonso;
Pe wana masenginia mazingi yo,
Loba kaka Nkombo mosantu wana na
libondeli.

³²⁶ Kaka, sala kaka bongo, loba Liloba pe loba Nkombo na Ye. Toyemba sikawa wana to—wana tozali kokabwana.

Mema Nkombo na Yesu,
Lokola nguba . . . pe ya mawa;
Ekopesa yo esengo pe libondisi,
Oo, mema yango bisika nyonso okokende.
Nkombo kitoko. . .

³²⁷ Sikawa topesana mbote ya loboko, pe toloba: “Nakobondela mpo na yo, ndeko, yo pe bondela mpo na ngai.”


. . . Lola;
Nkombo kitoko, Nkombo kitoko, O ya boboto!
Elikia ya mokili pe esengo. . .

³²⁸ Sikawa wana togumbi mitó, toyemba eteni oyo elandi.

Mema Nkombo na Yesu,
Lokola nguba liboso na motambo nyonso;
Wana masenginia mazingi yo,
Loba Nkombo mosantu wana na libondeli.
Nkombo kitoko, Nkombo kitoko; O ya boboto!
O ya boboto!
Elikia ya mokili pe esengo ya Lola;
Nkombo kitoko; O ya boboto!
Elikia ya mokili pe esengo ya Lola.

³²⁹ Wana togumbi mitó sikawa, ná mitema na biso, ná lisosoli ete Yesu alobaki: “Ye oyo akoyoka Maloba na Ngai pe akondima Motindi na Ngai, azali na Bomoi na seko pe akokóma na Esambiseli te, kasi asili kolongwa na kufa pe koingela na Bomoi.” Koyeba ete, na ngolu na Nzambe, tozali na yango na kati na biso; ná komibulisa epai na Ye na ntongo oyo, ete bomoi na biso ekobongwana, banda lelo, ete tokozala na makanisi malamumu koleka kati na biso. Tokomeka kobika na boboto pe na komikitisa mpenza, ete, na kondima ete oyo tosenji na Nzambe,

Nzambe akopesa yango na moko na moko. Pe tokolobana mabe te, to tokoloba mabe ya moto moko te. Tokobondela mpo na banguna na biso pe tokolinga bango, tokosala bolamu epai na baoyo bakosalela biso mabe. Nzambe nde Mosambisi na oyo alongi pe na oyo akwei. Ná . . .

³³⁰ Mpo na oyo, pe wana togumbi mitó, nakosenga na moninga na biso malamú, Ndeko Lee Vayle, soki akolinga kosukisa liyangani na libondeli. Ndeko Vayle. 

MPO NA NINI KOGANGA? LOBA! LIN63-0714M

(Why Cry? Speak!)

Liteya oyo ya Ndeko William Marrion Branham, eteyamaki liboso na Ngelesa na ntongo ya mokolo mwa lomingo, mokolo mwa 14 sanza ya nsambo, na mobu 1963, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2012 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org